

遊記第六册上

江陰徐宏祖霞客著

子別姓李

寄介立 輯

季夢良會明編

後學趙曦明敬夫

同邑

楊名時凝齋閱

族孫徐

鎮筠峪

重校

滇遊日記四

戊寅十月初一日凌晨起晴爽殊甚從三家邨啜粥啓行卽西

出峽中已乃與溪別復西逾嶺其三里入報恩寺仍轉東二里過松花壩橋又循五龍山而南三十里循省城東北隅南行已乃轉西度大橋則大溪之水自橋而南經演武場而出火燒鋪橋下南壩矣從橋西入省城東門飯於肆出南門抵向

遊記六册上  
滇四

一

所居停處則吳方生方出遊歸化寺未返余坐待之抵暮握

手喜可知也

見有晉寧歌童王可程以就醫隨吳來始知方生在唐守處過中秋甚洽也

初二日余欲西行往期阮仁吾所倩擔夫遇其姪阮玉灣阮穆聲詢候甚焦下午阮仁吾至寓以擔夫楊秀雇約至余期以五日後再往晉寧還卽啓行仁吾盡以番帳香扇

初三日余欲往晉寧與唐元鶴州守大來隱君作別方生言二君日日念君今日按君還省二君必至省謁見毋中途相左也盍少待之乃入叩玉灣并叩楊勝寰知麗江守相望已久旣而玉灣來顧寓中叩按君調兵欲征阿迷然兵未發而路人皆知之賊黨益猖狂於江川澂江之境矣玉灣謂余海



口有石城妙高相近有別墅已買山欲營構爲勝地請備車馬同行一觀余辭以晉寧之行不容遲因迤西之期久也又云緬甸不可不一遊請以騰越莊人爲導余領之

初四日余束裝欲蚤往晉寧主人言薄暮舟乃發不若再飯而行已而阮玉灣餽榼酒與吳君共酌之下午由羊市直南六里抵南壩下渡舟既暮乃行是晚西南關風舟行三十里至海夾口泊三鼓乃發棹味爽抵湖南涯北圩口乃觀音山之東南瀕海處其涯有溫泉焉舟人有登浴者余畏風寒不及沐也於是挂帆向東南行二十里至安江邨梳櫛於飯肆仍南四里過一小橋卽西邨四通橋分注之水爲歸化晉寧

遊記 六册上  
滇四

二

分界處又南四里入晉寧州北門皆昔來暗中所行道也至是始見田疇廣闊城樓雄壯焉入門門禁過往者不得入城蓋防阿迷不靖也既見大來各道相思甚急飯而入卽州尊如慰飢渴遂留歡宴夜寢於下道供帳極鮮整

初五至初七日日日手談內署候張調治黃從月黃沂水禹甸與唐君大來更次相倍夜宴必盡醉乃已

初八日飲後與黃沂水出西門稍北過陽城堡卽所謂古土城也其西北爲明惠夫人廟廟祀晉寧州刺史李毅女夫人功見一統志有元碑首句云夫人姓楊氏名秀娘李毅之女也旣曰李女又曰姓楊何謬之甚耶豈夫人之夫乃姓楊耶



然辭不達甚矣人傳其內猶存肉身外加髻焉故大倍於人  
余不信沂水云昔年鼠傷其足露骨焉不妄也是日州幕傳  
良友來拜且餽榼醴傳江西德化人

初九日余病嗽欲發汗遂臥下道

初十日嗽不止仍臥下道唐君晨夕至榻前邀諸友來看極  
殷綣

十一日余起復入內署蓋州治無事自清晨邀以入深暮而  
出復如前焉是日傅幕復送禮余受其雞肉轉寄大來處下  
午傅幕之親姜廷材來拜姜金谿人

十二日唐州尊餽新製長褶棉被余入謝并往拜姜於傅署

遊記 六册上 滇四

遇學師趙相見藹藹及往拜趙於學齋遇楊學師交相拜焉

詢趙師陸涼有何君巢阿否趙陸涼人故詢之趙言陸涼無之當是

浪穹人然同宦於浙中相善趙君陞任於此過池州問六安

何州君已丁艱去矣四月初至鎮遠其所主之家即何所先

主者是其歸已的但余前聞一僧言貴州水發時城中被難

者有一浙江鹽官損二十餘俱遭漂沒但不知其姓以趙君

先主鎮遠期計之似當其時心甚惴惴無可質問也從陳本叔集中

轉得二知已為吳太史淡人及何六安巢阿俱不及面豈  
淡人為火斃於長安今又有此水厄若果爾何遇之奇也

十三日州尊赴楊貢生酌張調洽以騎邀游金沙寺以有莊

田在其西麓也出西門見門內有新潤之房頗麗問之即調



治之兄也。

名口口。以鄉薦任常州判。甫自今春抵家。以讒與調治不睦。

出西門直西行田

塍中。路甚坦。其塢卽南自河澗鋪直北而出者。至此乃大開洋。北極於滇池焉。西界山東突。瀕塢者爲牧羊山。北突而最高者爲望鶴山。其北走之餘脈爲天城。又西爲金沙。則散而瀕海者也。東界山西突。而屏城南者爲玉案山。北峙而最高者爲盤龍山。其環北之正脊爲羅藏山。則結頂而中峙者也。州治倚東界之麓。大堡河澗合流於西界之麓。北出四通橋。分爲兩流。一直北下滇海。一東遶州北入歸化界。由安江邨入滇海。經塢西行三里。上溪堤。有大石梁跨溪上。是爲四通橋。由橋西直上坡。爲昆陽道。西北由岐一里半。爲天女城。上

遊記

六册上  
滇四

有天城門遺址。古石兩疊。如雕刻亭簷狀。昔李毅之女秀。代父領鎮時。築城於此。故名。城阜斷而復起。西北瀕湖者。其山長遶爲黃洞山。西南竝天城而圓聳夾峙者。爲金沙江山。此皆土山斷續。南附於大山者也。金沙之西。則滇海南漱而入。直逼大山。金沙之南。則望鶴山高擁而北瞰。爲西界大山。北隅之最。其西則將軍山聳崖突立。與望鶴駢峙。而出第望鶴。則北臨金沙。天城將軍則北臨滇海耳。黃洞山之西。有洲。西橫海中。居廬環集其上。是爲河泊所。乃海子中之蝸居也。今已無河泊官。而海子中渡船猶泊焉。其處正西與昆陽對。截湖西渡。止二十里。陸從將軍山遶湖之南。其路倍之。由天女



城盤金沙江北夾又一里半而入金沙寺寺門北向盤龍蓮  
峯師所建也寺頗寂寞由寺後拾級而上爲玉皇閣又上爲  
真武殿俱軒敞而北向瞻湖得海天空闊之勢山之西麓則  
連邨倚曲民居聚焉入調治山樓飯而登山凭眺寺中下步  
田畦水曲觀調治家人築場收穀戴月入城皎潔如晝而寒  
悄逼人還飯下道不候唐君而臥唐君夜半乃歸使人相  
問余已在夢魂中矣  
十四日在署中  
十五日在州署夜酌而散復出訪黃沂水其家寂然花陰歷  
亂惟聞犬聲還步街中恰遇黃黃乃呼酒踞下道門當月而  
酌中夜乃散

遊記

六册上  
滇四

五

十六日余欲別而行唐君謂連日因歌童就醫未歸不能暢  
飲使人往省名之爲君送別必少待之余不能却

十七十八日皆在州署

十九日在州署夜月皎而早陰霾

二十日二十一日在州署兩日皆修雨修霖

二十二日唐君爲余作溼靜聞骨記三易藁而後成已乃具  
酌演優并候楊趙二學師及唐大來黃沂水昆仲爲同宴以  
餞

二十三日唐君又餽棉襖夾褲具厚贖醫唐大來爲余作書  
文甚多且寄閃次公書亦以青蚨贖乃入謝唐君爲明日早



行計。晉寧乃滇池南一塢稍開其界西至金沙江山沿將軍山抵三尖邨與昆陽界不過二十里東至盤龍山頂與澂江界不過十里北至分水河橋與歸化界不過五里南入山塢與澂江界不過十里總計南北不過十五里東西不過三十里不及諸蠻酋山微一曲也。晉寧之水惟四通橋爲大其內有二溪俱會於牧羊山下石壁邨一爲大壩河卽河澗舖之流出自關索嶺者余昔往江川由之一爲大甫河出自鐵爐關者與新興分水之嶺界二水合而出四通橋又分其半東灌州北之田至州東北又有盤龍山澗之水自州城東南隅循城北流引爲城濠而下合於四通東灌之水遂北爲

遊記

六册上  
滇四

六

歸化縣分界而出安江邨其河乃唐公新濬者。晉寧二屬邑俱在州東北境亦滇海東南之餘塢也歸化在州北二十里呈貢又在歸化北四十里呈貢北卽昆明縣界東北卽板橋路東卽宜良界東南卽羅藏山陽宗界歸化北五里有蓮花洞山一名龍洞有水出其間羅藏山在歸化東十里盤龍山東北之主峯也東南距澂江府四十里其山高聳總孳衆山與邵甸之梁王山對亦謂之梁王山以元梁王結寨其上也西北麓爲滇池東南麓爲明湖撫仙湖水之兩分其歸者以此山爲界水之三匯其壑者亦以此山爲環然則比邵甸梁王此更磅礴矣其脈自鐵爐關東度爲關索嶺又東爲江



川北屈頽巔山，遂北走爲此山，又東至宜良縣西境，又北度楊林西嶺，又北過兔兒關，又北結爲郃甸梁王山，而爲果馬月狐之脊焉。晉寧四門皆傾圯，唐元鶴蒞任，卽修城建樓，極其壯麗。晉寧東至澂江六十里，西至昆陽四十里，南至江川七十里，北至省會一百里，東南至路南州一百五十里，東北至宜良一百六十里，西南至新興州一百二十里，西北至安寧州一百二十里。唐晉寧初授陝西三水令，以禦流寇功，卽陞本州知州，以憂歸，補任於此，乃郎年十五歲，文學甚優，落筆有驚人語，餘三子俱幼。唐大來名選貢，以養母，繳引詩畫書，俱得董元宰三昧，余在家時，陳眉公卽先寄

遊記

六册上  
滇四

七

以書云：良友徐霞客足跡遍天下，今來訪雞足，并大來先生。此無求於平原君者，幸善視之。比至滇，余囊已罄，道路不前，初不知有唐大來可告語也。忽一日遇張石夫，謂余曰：此間名士唐大來，不可不一晤。余游高堯時，聞其在傅元獻別墅，往覓之，不值，還省，忽有揖余者，曰：君豈徐霞客耶？唐君待先生久矣，其人卽周恭先也。周與張石夫善，與張先晤，唐唐卽以眉公書誦之，周又爲余誦之，始知眉公用情周摯，非世誼所及矣。大來雖貧，能不負眉公厚意，因友及友，余之窮而獲濟，出於望外如此。唐大來，其先浙之淳安，籍國初從戎於此，曾祖金嘉靖戊子鄉薦，任郃武同知，從祀名宦，祖堯官嘉



靖辛酉解元父懋德辛卯鄉薦臨洮同知皆有集唐君合刻之名紹箕堂集李本寧先生爲作序甚佳 大來言歷數先世皆一仕一隱數傳不更故其祖雖發解竟不仕而年甚長今大來雖未發解而詩翰爲滇南一人真不忝厥祖也但其亂嗣未耀二女俱寡而又旁無昆季後之顯者將何待乎

大來之岳爲黃麟趾字伯仁以鄉薦任山東嘉祥令轉四川順慶府口口縣令卒於任卽黃沂水禹甸之父從月之兄也其祖名明良嘉靖乙酉鄉薦仕至畢節兵憲有牧羊山人集 大來昔從廣南出粵西抵吾地亦以粵西山水之勝也爲

余言廣南府東半日多程有寶月關甚奇從廣南東望崇山

遊記 六册上  
滇四

八

橫障翠截遙空忽山間一孔高懸直透中扃光明如滿月綴雲端真是天門中開路由其下盤躋而入大若三四城門其下旁又一竅潛通滇粵之水予按黃麟趾昭陽關詩注云關

口天成一石虎頭眈眈可畏

詩曰何代鑿鴻濛蠻山竅窳通五丁輸地力一竅自天工城畛

華彝界關當虎豹雄乘  
縞愁日暮驅策亂流中

按昭陽卽此洞也唐君謂之寶月者

又其別名耳此路東去卽歸順余去冬爲交彝所梗不能從此 盤龍山蓮峯祖師名崇照元至正間以八月十八日涅槃作偈曰三界與三塗何佛祖不由不破則便有能破則便無老僧有吞吐不下門徒不肯用心修切忌切忌師素不立文字臨去乃爲此與遺蛻俱存至今以此日爲盤龍會云



邵真人以正初名璇晉寧人其父名仁叔名忠俱由蘇州徙

此閣老劉口挽忠詩有曰三郎足下風雲達忠子班領鄉薦小阮壺

中日月長即真人末句又曰悵望蘇州是故鄉見州志晉時晉

寧之地曰寧州南蠻校衛李毅持節鎮此討平叛會五十八

部惠帝時李雄亂毅死之女秀有父風眾推領州事竟破賊

保境比卒羣酋為之立廟是時寧州所轄之境雖廣而駐節

之地實在於此至唐武德中以其為晉時寧州統會之地置

晉寧縣此州名之所由始也州名宦向有李毅及王遜姚岳

等迨萬歷間吳郡許伯衡修州志謂今晉寧州地已非昔時

五十八部之廣以一隅而僭通部之祀非諸侯祭封內山川

遊記 六册上 滇四

九

義遂一併徹去之并志傳亦削去祇自我朝始遂令千載英

靈空存盼蠻一方故實竟作塵灰可歎也然毅雖削而其女

有廟在古城岳雖去而岳亦有廟在州西有功斯土非豎儒

所能以意滅者也許伯衡謂昔時寧州地廣今地狹李毅雖

嫡祖晉寧不得而祀之猶支子之不得承祧祀大宗也余謂

晉寧乃嫡冢非支子比毅所轄五十八部雖廣皆統於晉寧

今雖支分五十八部皆其支庶而晉寧實承祧之主若晉寧

以地狹不祀將委之五十八部乎五十八部復以支分非所

宜祀是猶嫡冢以支庶眾多互相推委而虛大宗之祀也然

則李毅一方宗祖將無若敖之恫乎故余謂唐晉寧唐大來



首以復祀李毅爲正。

二十四日街鼓未絕唐君令人至言早起觀天色見陰雲釀雨風寒襲人乞再遲一日候稍霽乃行余謝之曰行不容遲雖雨不爲阻也及起風雨淒其令人有黯然魂消意令庖人速作飯余出別唐大來時余欲從海口安寧返省完省西南隅諸勝從西北富民觀螳螂川下流而取道武定以往雞足乃以行李之重者託大來令人另齎往省而余得輕具西行焉方抵大來宅報晉寧公已至下道亟同大來及黃氏昆玉還道中晉寧公復具酌於道秣馬於門時天色復朗遂舉大觥登騎就道從西門三里度四通橋從大道直西行半里上

遊記 六册上

滇四

十

坡從其西峽轉而西南上一里半直躡望鶴嶺西岫又西下涉一澗稍北卽瀕滇池之涯共五里循南山北麓而西有石聳起峯頭北向指滇池有操戈介冑之狀是爲石將軍亦石峯之特爲巉峭者其西有廟北向是爲石魚廟其西南又有山西突起亞於將軍者卽石魚山也又西二里海水中石突叢叢是爲牛戀石涯上卽與鄉俱以牛戀名

謂昔有衆牛飲於海子戀而不

去遂成

於是又循峽而南二里逾平坡南下有水一塘直浸

南山之足是爲三尖塘塘南山巒高列塘北度脊平衍脊之北卽滇池牛戀塘水不北洩而東破山腋始知望鶴之脈自西來不自南來也從塘北西向湖塢入其塢自西而東卽塘



水之上流也。三里塢西盡處有三峯排列其南，最高者卽南山之再起者也。其中一峯則自南峯之西遶峽而北峙爲中峯焉。北峯則瀕滇池而東，度爲石將軍望鶴山之脈矣。中峯之東有邨落，當塢是爲三尖邨。晉寧邨落止此。西沿中峯而上一里，與南峯對夾之中，復阻水爲塘，不能如東塘之大而地則高矣。又平上而西一里，逾中峯之脊，從脊上西南直行爲新興道，逾脊西北下，卽滇池南涯。是爲昆陽道，而晉寧昆陽以是脊爲界焉。於是昆陽新舊州治俱在一望直下半里。沿滇池南山隴半西行二里餘，有邨在北涯之下。滇池之水環其前，是曰赤峒裏，亦池濱聚落之大者。又西由邨後逾嶺

遊記

六册上  
滇四

十一

南上，旣西下三里，有邨倚南山北麓，盤其嘴而西。於是西峽中開，自南而北，與西界山對夾成塢。其脊南自新興界分支北下，西一支直走而爲新舊州治，而北盡於舊寨邨。東一支卽赤峒裏之後山濱池而止。東界短，西界長，中開平塢爲田。一小水貫其中，亦自南而北入滇池。卽志所稱渠濫川也。

書史萬歲爲行軍總管自蜻蛉川至渠濫川破三十餘部當卽指此

由東嘴截塢而西正與新

隋

徑塢三里，又隨西界之麓北出一里半，是爲昆陽新城。又北一里半，爲昆陽舊城。於是當滇池西南轉摺處矣。舊城有街衢闐堵而無城郭，新城有樓櫓雉堞而無民廬，乃三四年前



舊治經寇故卜築新邑而市舍猶仍舊貫也舊治街自南而北西倚山坡東瞰湖涘至巳日西昃亟飯於市此州有天酒泉普照寺以無奇不及停屐遂北行四里稍上逾一東突之峒其山自西界橫突而出東懸滇海中路逾其峒中北下其北滇海復嵌塢西入其突出之峯遠眺若中浮水面而其西實連綴於西界者也乃西轉涉一塢共四里又北向循滇池西崖山麓行五里又有小峯傍麓東突南北皆湖山環抱之數十家倚峯而居是爲舊寨邨由邨北過一塢其塢始自西而東塢北有山一派亦自西而東直瞰滇海中北二里抵山下直躡山北上。一里餘從崩崖始轉東向山半行又里餘從

遊記

六册上

滇四

十二

東嶺盤而北其嶺南北東三面俱懸滇海中正東與羅藏隔湖相對此地杳僻隔絕行者爲畏途焉嶺北又有山一支從水涯之北亦自西而東直瞰滇海中與此嶺南北遙對成峽滇海驅納其中外若環窩中駢束戶是爲海口南嶺北下之處峻削殊甚余慮日暮驅馬直下二里復循塢西入二里西逾一峒由峒西下山塢環開中爲平疇滇池之流出海就峽中貫成河是爲螳螂川焉二里有邨傍塢中南山下過之行平疇間西北四里直抵川上有聚落成衢濱川之南是曰茶埠墩卽所謂海口街也有公館在焉監察御史案臨必躬詣其地爲一省水利所係耳先是唐晉寧謂余海口無宿處可



往柴厰莫土官鹽肆中宿蓋唐以候代巡常宿其家也余聞其處尚相去六七里而日色已暮且所謂海門龍王廟者已反在其東二里又聞阮玉灣言有石城之勝亦在斯地將留訪焉遂不復前覓逆旅投宿

二十五日令二騎返晉寧余飯而躡屨北抵川上望川北石崖轟空川流直嚙其下問所謂石城者土人皆莫之知惟東指龍王堂在盈盈一小間乃溯川南岸東向從之二里南岸山亦突而臨川水反舍北而逼南南崖崩嵌盤沓而北崖則開遶而受民舍焉是爲海門邨與南崖相隔一水不半里中有洲浮其吭間東向滇海極平吐之勢峙其上者爲龍王堂

遊記 六册上  
滇四

十三

時渡舟在邨北岸呼之莫應余攀南崖水窟與水石相爲容與忘其身之所如也久之北崖邨人以舟至遂渡登龍王堂堂當川流之中東臨海面時有賽神者浮舟而至而中無廟祝後有重樓則阮祥吾所構也廟中碑頗多皆化治以後撫按相度水利開濬海口免於汎濫以成瀕海諸良田者故巡方者以此爲首務云出廟渡北岸居廬頗集其北向所倚之山有二重第一重橫突而西多石而西並最高卽轟削而瀕於川之北岸者第二重橫突而東多土而東遠最遠卽錯出而盡爲池之北圩者一重層疊於邨後蓋北自觀音山盤礴而盡於此邨氓俱阮氏莊佃余向詢阮玉灣新置石城之勝



士人莫解謂阮氏有墳在東岸悞指至此邨人始有言石城在里仁邨其邨乃猶羅寨正與茶埠墩對從此有小徑向山後峽中西行三里可至余乃不東向阮墳而西覓里仁焉卽由邨後北逾第一重石峯之脊北向下路旁多錯立之石北亦開塢而中無細流一里隨塢西轉已在川北岸矗削石峯之後蓋峯南漱逼川流故取道於峯北耳其內桃樹萬株被隴連壑想其蒸霞煥彩時令人笑武陵天台爲燭火矣西一里過桃林則西塢大開始見田疇交塍溪流霍霍邨落西懸北山之下知其卽爲里仁邨矣蓋其塢正南矗立石山西盡於此塢瀕於川亦有一邨臨之是爲海口邨與茶埠墩隔川

遊記 六册上  
滇四

十四

相對有渡舟焉其塢之東北逾坡塢之西北循峽皆有路凡六十里而抵省會而里仁邨當塢中北山下半里抵邨之東見流泉交道山崖間樹木叢蔭上有神宇蓋龍泉出其下也東塢以無泉故皆成旱地西塢以有泉故廣闊良疇由邨西盤山而北西塢甚深其塢自北峽而出直南而抵海口邨焉邨西所循之山其上多蹲突之石下多崆峒之崖有一竅二門西向而出者余覺其異詢之士人石城尙在塢西嶺上其下亦有龍泉可遵之而上共北半里乃西下截塢而度有一溪亦自北而南中乾無流涉溪西上共半里聞水聲灑灑則龍泉溢西山樹根下瀦爲小潭分瀉東南去由潭西上嶺半



里則嶺頭峯石湧起有若卓錫者有若夾門者有若芝擎而爲臺有若雲臥而成郭者於是循石之隙盤坡而上墜壑而下其頂中窪石皆環成外郭東面者巒岈森透西面者穹覆壁立南面則余之逾脊而下者北面則有石窟曲折若離若合間一石墜空當闕下覆成門而出入由之圍壑之中底平而無水可以結廬是所謂石城也透北門而出其石更分枝簇萼石皆青質黑章廉利稜削與他山迥異有牧童二人引余循崖東轉復入一石隊中又得圍崖一區惟東面受客如門其中有跌座之龕架板之牀皆天成者出門稍南迴顧門側有洞岈然亟轉身披之其洞透空而入復出於圍崖之內

遊記

六冊上  
滇四

十五

始覺由門入不若由洞入更奇也計圍崖之後卽由石城中望所謂東面巒岈處矣出洞仰眺洞上石峯層沓高聳無比復有一老獐攤披獸皮前來引余相與攀躋其上如衆臺錯立環中窪而峙其東東眺海門明鏡漾空西俯窪底翠瓣可數而隔崖西峯穹覆之上攢擁尤高乃下峯復度南脊轉造西峯則穹覆上崖復有後層分列其中開峽東墜危坑而下其後則土山高擁負辰於上聳立之石或上覆平板或中剖斜櫺崖脇有二小穴如鼻孔羣蜂出入其中蜜漬淋漓其下乃崖蜂所巢也兩牧童言三月前土人以火熏蜂而取蜜蜂已久去今乃復成巢矣童子競以草塞孔蜂輒踴踴然作銅



鼓聲凭覽久之乃循鑿坑之北東向懸崖而下經東石門之外猶令人一步一回首也先是從里仁邨望此山峯頂聳石一叢不及晉寧將軍峯之偉杰及抵其處而闔闢曲折層沓瓊瓏幻化莫測鐘秀獨異信乎靈境之不可以外象求也蓋是峯西倚大山此其一支東竄峯頂中坳石骨內露不比他山之以表暴見奇者第其上無飛流涵瑩之波中鮮剪棘梯崖之道不免爲鬼狐所窟耳老獾羅言此石隙土最宜茶茶味迥出他處今阮氏已買得之將造菴結廬招淨侶以開勝壤豈君卽其人耶余不應去信平買山而居無過此者下山仍過塢東一里經里仁邨東南一里抵螳螂川之北西望海

遊記

六册上  
滇四

十六

口有渡可往茶埠而東眺瀕川石崖聳削先從茶埠隔川北望於巔岬嵌突中見白垣一方若有新茅架其上者今雖崖石掩映不露其影而水石交錯高深嵌空其中當有奇勝遂東向從之抵崖下崖根插水亂石潑洄遂攀躋水石間沿崖南再東忽見石上有痕躡崖直上勢甚峻挂石懸崖之跡俱倒影水中方下見爲奇又忽聞磬咳聲落頭上雖仰望不可見知新茅所建不遠矣再穿下覆之石則白垣正在其上一道者方鑿崖填路迎余入坐茅中其茅僅逾方丈明窓淨壁中無供像亦無農具蓋初落成而猶未棲息其間者道人吳姓卽西邨海口人向以賈游於外今歸而結淨於此可謂得



所托矣坐茅中上下左右皆危崖綴影而澄川漾碧於前遠  
峯環翠於外隔川茶埠卹廬繚繞煙樹堤花若獻影鏡中而  
川中鳧舫買帆魚罾渡艇出沒波紋間棹影躍浮嵐櫓聲播  
半篁恍然如坐畫屏之上也既下仍西半里問渡於海口卹  
南度茶埠街入飯於主家已過午矣茶埠有舟隨流十里往  
柴廠載鹽渡滇池余不能待遂從卹西遵川堤而行其堤自  
茶埠西達平定隨川南涯而築之蓋川水北依北岸大山而  
西其南岸山勢層疊中多小塢故築堤障川堤之南屢有小  
水自南峽出亦隨堤下注從堤上西行川形漸狹川流漸迅  
七里卹廬倚堤北下臨川堤間有亭有碑卹所謂柴廠也

遊記

六冊上

滇四

十七

按舊碑謂之漢廠莫土官鹽肆在焉至此川迅石多漸不容  
舟川漸隨山西北轉矣堤隨之又西北七里水北向逼山入  
峽路西向度塢登坡又二里數家踞坡上曰平定哨時日色  
尙高以土人言前途無宿店遂止

二十六日雞再鳴北向循西山行三里曙色漸啓見有岐自  
西南來者有岐自東北來者而中道則直北逾坳蓋西界老  
山至此度脈而東特起一峯當關中突障扼川流東曲而盤  
之流爲所扼稍東遜之遂破峽北西向墜級爭趨所謂石龍  
壩也此山名爲九子山實海口下流當關之鍵平定哨在其  
南大營莊在其東石龍壩在其北山不甚高大員阜特立正



當水口故自爲雄耳。山巔有石九枚其高逾於人，駢立峯頭。土人爲建九子母廟，以石爲九子，故以山爲九子母也。余時心知正道在中，疑東北之岐爲便道，且可一瞰川流，遂從之一里，抵大營莊，則川流轟轟在下，舟不能從水，陸不能從峽，必仍還大路，逾坳乃得。於是輟從峯西逾嶺北下，共二里，有小水自西南峽來，渡之，復西上逾坡，則坡北峽中，螳川之水自九子母山之東破峽北出，轉而西，遶山北而墜峽，峽中石又橫咀而層闕之，水橫衝直搗，或跨石之頂，或竄石之脇，湧過一層，復騰躍一層，半里之間，連墜五六級，此石龍壩也。此水之不能通舟，皆以此石爲梗。昔治水者，多燔石鑿級，不能成功，土人言鑿而輒長，未必然也。石級旣盡，峽亦北轉，路從峽西山上，隨之北行，下瞰級盡處，峽中有水一方，獨清瀦。土人指爲青魚塘，言塘中青魚大且多。按志，昆陽平定鄉小山下有三洞，泉出匯而爲潭，中有青魚白魚，俗呼隨龍魚，豈卽此耶？北二里，峽稍開，有邨在其下，爲青魚塘邨。北二里西，北躡一嶺，此嶺最高，始東見觀音山，與羅漢寺碧雞山兩峯，東峙，又北見遙山，一重橫亘，衆山之北，西盡處特聳一峯，最高，爲筆架山，其西又另起一峯，與之駢立，則老龍之龍山也。東盡處分峙雙岫，亦最高，爲進耳山，其南坳稍伏而豁，則大道之碧雞關也。而最高之間，有尖峯獨銳，透穎於橫脊之南。



是為龍馬山其下則沙河之水所自來也惟西向諸山稍伏

而豁大道之往迤西者從之而老脊反自伏處南度老龍之脊西北

自麗江鶴慶東南下至楚雄府南又東北至祿豐羅次北境又東至安寧州西北境東突為龍山遂南從安寧州之西又南度三泊縣之東又南向遶昆陽州之西南乃折而東經新與州北為鐵爐關又東經江川縣北為關索嶺又東峙為屈嶺巔山乃折而東北為羅藏山則滇池撫仙湖之界脊也始西一里逾其巔又西北下一

里則螳川之水自嶺之北麓環而西又轉而南嶺西有邨瀕

川而居置渡川上是曰武趣河昆陽西界止此過渡即為安

寧州界武趣之河遶邨南曲復轉西峽去路渡河即西北上

坡連越土壠二重共五里北下有水一塘在東塢中又北二

里有水一塘在西塢中又北一里半有邨在路東又北一里

遊記 六册上 滇四

十九

半坡乃北盡坡北始開東西大塢乃下坡西向行塢中二里

有水東北自北界橫亘中尖峯下來是為沙河其流頗大石

梁東西跨之河從梁下南去螳川之水自武趣西峽轉而北

來二水合於梁南半里遂西北至安寧州城之南於是北向

經城東而北下焉過沙河橋又西北一里則省中大道自東

北來螳大川自城南來俱會於城東有巨石梁東西跨川上

勢甚雄壯過梁即為安寧城入其東門闐闐頗集乃沽飲於

市為溫泉浴計飲畢忽風雨交至始持傘從南街西行已而

知道祿祿大道乃返而至東門內從東街北行半里過州前

從其東復轉北半里有廟門東向額曰靈泉余以為三潮聖



水也。入之有巨井在門左。其上累木橫架爲梁欄。上置轆轤

以汲。乃鹽井也。其水鹹苦而渾濁。殊甚。有監者。一日兩汲而

煎焉。

安寧一州。每日煎鹽千五百觔。城內鹽井四。城外鹽井二十四。每井大者煎六十觔。小者煎四十觔。皆以桶

擔汲而煎於家。

又西轉過城隍廟而北半里。出北門。風雨淒淒。路無

行人。余與不爲止。冒雨直前。隨螳川西岸而北。三里半。有邨

在。西山麓。其後廟宇。東向。臨之。余不入。又北二里半。大路盤

山西北轉。有岐下坡。隨川直北行。余乃下從岐。一里半。有舟

子。艤舟渡。上川東岸。雨乃止。復循東麓而北。抵北嶺下。川爲

嶺扼。西向盤壑去。路乃北向。陟嶺。嶺頗峻。一里逾嶺北。又一

里。下其北塢。有小水自東北來。西注於川。橫木橋度之。共一

遊記 六册上 眞四

里。又西北上坡。有邨當坡之北。路從其側。一里逾坡而北。再

下。再上。共三里。西瞰螳川之流。已在崖下。崖端有亭。忽從足

底湧起。俯瞰而異之。亟捨路西向下。入亭中。見亭後石骨片

片如青芙蓉。湧出其北。復有一亭。下乃架木而成者。瞰其下

則中空如井。有懸級在井中。可以宛轉下墜。余時心知溫泉

道尚當從上北行。而此奇不可失。遂從級墜井下。其級或鑿

石或嵌木。或累梯。共三轉。每轉約二十級。共六十級。而至井

底。井孔中僅圍四尺。其深下垂及底約四五丈。井底平拓。旁

裂多門。西向臨螳川者爲正門。南向者爲旁門。旁門有屏斜

障。屏間裂竅四五。若窻櫺戶。牖交透。疊映。土人因號之曰七



竅通天七竅者謂其下之多門通天者謂其上之獨貫也旁門之南崖壁巉削屏列川上其下洞門另闢駢開凡三四處皆不甚深透然川漱於前崖屏於上而洞門累累益助北洞之勝再南崖石轉突處有一巨石下墜崖側迎流界道有題其為醒石者為冷然筆

冷然學道楊師孔號楊係貴州人

石北危崖之上有

大書虛明洞三大字者高不能矚其為何人筆其上南崖有石橫斜作垂手狀其下亦有洞西向頗大而中拓然無嵌空透漏之妙虛明二字非北洞不足以當之虛明大書之下又有刻聽泉二字者字甚古拙為燕泉筆

燕泉都憲何孟春號何郴州人又白敘為

吾邑又其側有此處不可不飲為升菴筆

升菴楊太史慎號

而刻不佳

遊記

六册上  
滇四

二十一

不若中洞門右有此處不可不醉為冷然筆刻法精妙遂覺後來者居上又聽泉二字上刻醒石詩一絕標曰姜思睿而醒石上亦刻之標曰譜明譜明不知何人一詩二標豈譜明即姜之字耶此處泉石幽倩洞壑瓊瓏真考槃之勝地惜無一人棲止大洞之左穹崖南盡復有一洞見煙自中出亟入之其洞狹而深洞門一柱中懸界為二竅有猶羅囚髮赤身織草履於中煙即其所炊也洞南崖盡即前南來之塢下而再上處也時顧僕留待北洞余復循崖沿眺而北北洞之右崖復北盡遂躡坡東上仍出崖端南來大道半里有菴當路左下瞰西崖下廬舍駢集即溫泉在是矣菴北又有一亭高



綴東峯之半其額曰冷然當溫泉之上標以御風之名楊君可謂冷暖自知矣由亭前躡石西下石骨棱厲余愛其石攀之下墜則溫池在焉池匯於石崖下東倚崖石西去螻川數十步池之南有室三楹北臨池上池分內外外固清瑩內更澄澈而浴者多就外池內池中有石高下不一俱沉水中其色如綠玉映水光豔熿然余所見溫泉滇南最多此水實爲第一池室後當東崖之上有佛閣三楹額曰暖照南坡之上有官宇三楹額曰振衣千仞皆爲土人鎖鑰不得入余浴旣散步西街見賣漿及柿者以浴熱買柿啖之因問知虛明之南尙有雲濤洞川之西岸曹溪寺爰有聖水相去三里皆反

遊記 六冊上  
滇四

在其南可溯螻川而遊也蓋溫池之西濱螻川東岸夾廬成衢隨之而北百里而達富民川東岸山最高者爲筆架峯卽在溫池東北志所謂岱畎山也川西岸山最高者爲龍山曹溪在其東隴之半志所謂葱山也二山夾螻川而北流而葱山則老脊之東盤者矣余時抵川上欲先覓曹溪聖水而渡舟在川西岸候之不至遂南半里過虛明諸洞下南抵崖處披曲爲塢宜仍循川岸而南以無路遂上昔來大路隅由小岐盤西崖而南亦再下再上一里半有一邨在坡南是爲沈家莊老婦指雲濤洞尙在南坡外又南涉塢半里登坡路絕而不知洞所在西望隔川有居甚稠其上有寺當卽曹溪有



邨童拾薪川邊遙呼而問所謂雲濤洞者其童口傳手指以川隔皆不能辨望見南坡之下有石崖一叢漫趨之至其下仰視石隙叢竹娟娟上有朱扉不掩登之則磴道逶迤軒亭幽寂餘花殘墨狼藉蹊間雲牖石牀離披洞口軒後有洞門下嵌上有層樓橫跨皆西向先登其樓樓中供大士諸仙像香几燈案皆以樹根爲之多有奇古者其南有臥室一楹米盎書籠猶宛然在內而苔衣蘿網封埋已久寂無徑行不辨其何人所構何因而廢也下樓入洞初入若室一楹側有一窞下陷窞黑其北又裂一門透裂入有小竅斜通於外見竹影窻入卽墮黑而下南下杳不知其所底北眺亦有一牖上

遊記

六册上

滇四

二十三

透第透處甚微光不能深燭以手捫隘以足投空時時兩無所著又時時兩有所碍旣至其底忽望西南有光熒然轉一隘始見其光自西北頂隙透入其處底亦平而上復穹焉高盤倏然有影掠隙光而過心異之呼願僕聞應聲正在透光之隙其所過影卽其影也復轉入暗底隙隘崖懸無由著足然而機關漸熟升躋似易覺明處之魂悸不若暗中之膽壯也再上一層則上牖微光亦漸定中生朗其旁原有細級宛轉崖間或頽或整但初不能見耳出洞仍由前軒出屏外見右崖有石刻一方外爲棘刺結成窠網遙不能見余計不能去竟踐而入之中履俱爲鉤卸又以布縛頭護網始得讀之



乃知是菴爲天啓丙寅州人朱化孚所構。朱壬辰進士其樓閣軒

亭俱有名額住山僧亦有名有詩未久而成空谷遺構徒存

祗增慨耳既下至川岸若一航渡之卽西上曹溪時不得舟

仍北三里至溫泉就舟而渡登西岸溯川南行望川東虛明

崖洞若卽若離杳然在落花流水之外南一里又見川東一

崖排突亦如虛明其下亦有多洞迸裂門俱西向有大書其

上爲青龍洞爲九曲龍宮者隔川望之不覺神往土人言此

二洞甚深篝火以入可四五里但中黑無透明處此洞卽在

沈家莊北余前從虛明沿川岸來卽可得之悞從其上行崖

端而不知深爲悵悵然南之雲濤北之虛明旣已兩窮此洞

遊記 六册上

滇四

二四

已去而復得之對涯亦未爲無緣也又南一里抵川西邨聚  
從其後西上山轉而南又西上共一里遂入曹溪寺寺門東  
向古刹也余初欲入寺覓聖泉見殿東西各有巨碑爲楊太  
史升菴所著乃拂碑讀之知寺中有優曇花樹諸勝因覓紙  
錄碑遂不及問水是晚炊於僧寮宿於殿右

二十七日晨起寒甚余先晚止錄一碑乃殿左者錄未竟僧

爲具食乃飯而竟之有寺中讀書二生以此碑不能向來相

問余爲解示

二生一姓孫安寧州人一姓黨三洎縣人

黨生因引余觀優曇樹其

樹在殿前東北隅二門外坡間今已築之牆版中其高三丈

餘大一人抱而葉甚大下有嫩枝旁叢聞開花當六月伏中



其色白而淡黃大如蓮而瓣長其香甚烈而無實余摘數葉置囊中遂同黨生由香積北下坡循坳而北一里半觀聖泉泉從山坡大樹根下南向而出前以石環爲月池大丈餘瀦水深五六寸餘波淙淙由東南坡間瀉去余至當上午早潮已過午潮未至此正當縮時而其流亦不絕第潮時更湧而大耳黨生言穴中時有二蟾蜍出入茲未潮故不之見卽碑所云金龜號曰泉神者矣月池南有亭新構扁曰問潮亭前巡方使關中張鳳翮爲之記黨生又引余由泉西上坡西北緣嶺上半里登水月菴菴東北向乃葱山之東北坳中矣菴潔而幽爲鄉紳王姓者所建庭中水一方大僅逾尺乃建菴

遊記 六册上  
滇四

三五

後劓地而出者菴前有深池泉不能畜也既復下至聖泉還至曹溪北坡均黨生別余上寺余乃從岐下山二里抵昨邨後上山處由邨後南行半里復東望川東迴曲中石崖半懸飛樓臨丹卽雲濤洞也川水已從東盤曲路猶循西山南向下因其山塢自南而轉也一里餘始循南山而東二里則其川自塢北曲而南與路遇既過路又循東山溯谿轉而北一里乃東向陟南山之北一里乃轉東南行一里南陟一西來之峽又南上坡一里與前來溫泉渡西大道合始純南行六里入北城門見有二女郎辮髮雙垂肩後此間幼童女辮髮一條垂腦後女郎及男之長者辮髮兩條垂左右耳旁女仍用包髻男仍用巾帽冠其上若擗攤則辮髮一條週環於腦額若箍其首者又



有男子未冠者從後腦下另挽一小髻若螺綴於後焉。手執紈扇嫣然在前後有一老

婦隨之攜牲盒紙錠將掃墓郊外。此間重十月朝祭掃家貧不及者至月終亦不免也。

南中所見婦女纖足姣好無逾此者入城一里半飯於東關乃出逾巨石梁遵大道東北行半里有小溪自東塢來溯之行從橋南東去三里半上坡又一里逾東安哨嶺嶺不甚峻東北從橫亘大山分隴西南下爲安寧東第一護城之砂者也過嶺東下始見沙河之水自東北來隨其塢東入過站摩村共十五里爲始甸舖又四里過龍馬山岢岢北透橫亘大山之南路遶其前而東又四里始與沙河上流之溪遇有三鞏石梁東跨其上。是曰大橋其水自東北進耳二尖峯西棋

遊記 六册上

滇四

二十六

盤山南峽來西南至安寧城東南入於螳川者也又半里東上坡宿於高規橋村

二十八日平明東行一里半上坡爲安寧東界由此卽爲昆明地陂陀高下以漸升陟而上八里其塢自雙尖後進耳山來路遂由南隴上又二里山坳間有聚廬當尖是爲碧雞關蓋進耳之山峙於北羅漢之頂峙於南此其中間度脊之處南北又各起一峯夾峙以在碧雞山之北故名碧雞關東西與金馬遙對者也關之東向東南下爲高嶢乃草海西岸山水交集處渡海者從之向西北下爲赤家鼻官道之由海堤者從之余時欲游進耳遂西北下坡半里循西山北行二里



有邨在西山之麓是爲赤家鼻大道由其前北去乃西折而入邨邨倚山而廬有池瀦坡側大不逾五尺邨人皆仰汲焉中復有魚有垂釣其上者亦龍潭之淺者也由池南上坡嶺道甚峻半里登岡上稍北而曲有坊當道則進耳山門外坊也其寺尙隔一坑由坊西望見寺後大山環於上此岡達於前內夾深坑旋轉而入若耳內之孔寺臨孔上盤朶邊以進取名之義非身履此岡不見其親切也進坊西向沿坑入半里有岐西逾大山之峒而入寺之路則沿坑南轉盤崖半里西上入寺中寺門東向登其殿頗軒爽似額端不似耳中也方丈在殿北有樓三楹在殿南其樓下臨環坑遙覽滇海頗

遊記 六册上 滇四

如太華之一碧萬頃而此深遠矣入方丈有辛貢士伯敏者迎款慇懃僧寶印欲具食辛揮去令其徒陳履惇陳履溫二乃甲戌進陳及其弟出見且爲供葷食復引余登殿南眺海樓

坐談久之余欲趨棋盤山問道於寶印寶印曰由坊東下山自赤鼻山寶珠寺上爲正道路且三十里由此寺北西逾大山之峒其路半之但空山多岐路無從覓耳乃同辛君導余從殿後出遂北至峒下東來岐路始別去余乃西上半里逾峒半里西北稍下一里涉中窪窪西復有大山南北橫嶺與東界進耳後雙尖并峒北之巔東西夾成中窪由窪西復循西山之東北行一里循嶺北轉而西稍下一里度峽西上其



西復有大山南北橫峙遂西向橫躡之一里半登其巔見西南隨塢有路上逾其脊將趨之有負芻者來曰棋盤路在北不在西也乃循西山之東又北行其路甚微若斷若續二里半從西山北岫透脊西出始望見三家村在西塢中村西盤峙一峯自北而南如屏高擁卽棋盤山也其脈北自妙高寺三華山西南來復聳此峯分支西度爲溫泉之筆架山分支南下爲始甸後之龍馬山南環東亘卽爲所逾之脊而南度爲進耳碧雞者也脊北山復橫列東北至寶珠赤鼻而止爲三家邨東界護山余昔來自金馬以東卽遙望西界山橫如屏其頂復有中懸如覆釜高出其上者卽此棋盤峯也而不

遊記

六册上

滇四

二十八

知尙在重壑之內外更有斯峯護之洵西峯之領袖矣從岫西轉循東山北崖半里乃西向下二里行壑中有水北流西涉之又半里抵三家邨其邨倚棋盤東麓路當從邨北西上乃悞由邨南度脊處循峽西南上竟不得路攀躡峽中三里登一岡有菴三楹踞坪間後倚絕頂其前東瞰滇中乃髮僧元禪與僧裕菴新建者元禪有內功夜坐峯頭曉露濕衣無所退怖菴中四壁未就不以爲意也日已西昃迎余淪茗煮粥抵暮乃別西上躋峯一里陟其巔又西向平行頂上一里有寺東北向卽棋盤寺也時已昏黑遂啜茗而就榻

二十九日凌晨起僧爲余炊余乃獨躡寺後絕頂時曉露甚



重衣履沾透頂間無高松巨木卽叢草亦不甚深茂蓋高寒之故也頂頗平迥其西南皆石崖矗突其性平直而中實可劈爲板省中取石皆於此遙負之然其上反不能見以均於內也西北塢中有大壑迴環下有水二方卽廬踞其上卽志所載勒甸村龍泉也其水分青白色西南峽中水則循龍馬山東而去當卽沙河之源矣東南卽三家之流是頂亦三分水之處第一入滇池兩入螳川皆一派耳由頂遠眺則東北見堯林山尖聳與邵甸梁山竝列東南見羅藏山環峙海外直南見觀音山岬嶼爲碧雞絕頂掩映半浮半隱直西則溫泉筆架山連翩而去惟西北崇山稍豁則螳川之所向

遊記

六册上

滇四

二十九

也下飯於寺乃同寺僧出寺門東行三十步觀棋盤石石一方橫臥嶺頭中界棋盤紋縱橫各十九道其北臥石上楷書玉案晴嵐四大字乃碧潭陳賢所題南有二石平度中夾爲穴下墜甚深僧指爲仙洞昔有牧子墜羊其中遂以石填塞之僧言此山之腹皆崆峒但不得其門而入耳穴側亦有陳賢詩碑已剝不可讀乃還寺錄昆明令汪從龍詩碑仍令幼僧導往峯西南觀鑿石之崖其崖上下兩層鑿成大窟如厦屋其石色青綠者則膩而實黃白者則粗而剛其崖間中嵌青綠色者兩層如帶圍各高丈餘故鑿者依而穴之其板有方有長方者大徑五六尺長者長徑二三丈皆薄一二寸其



平如鏡無纖毫凹凸真良材也還從寺前東向下一里過新  
菴之左直下者一里半過三家邨左渡澗又一里半東逾石  
山之坳其山乃東界北走之脈至此復突一峯遂北盡焉從  
坳東墜崖而下復漸成一坑隨之行三里爲寶珠寺未至寺  
其西墜峽處坑水潰而爲瀑懸崖三級下深可十五六丈但  
水細如絡絲不如疋練也寶珠寺東向倚山之半亦幽亦敞  
由其前墜坡直下五里抵山麓爲石鼻山聚落甚盛蓋當草  
海之西碧雞關大道卽出其下也由邨轉北一里半東北與  
大道合於是東向湖堤二里半有邨當堤之衝曰夏家窰過  
此遂遵堤行湖中堤南北皆水窪堤界其間與西子蘇堤無

遊記

六册上  
滇四

三十

異蓋其窪卽草海之餘南連於滇池北抵於黃土坡西瀕赤  
鼻山之麓東抵會城其中支條錯遶或斷或續或出或沒其  
瀕北者志又謂之西湖其實卽草海也昔大道迂迴北坡從  
黃土坡入會城傅元獻爲侍御時填窪支條連爲大堤東自  
沐府魚塘西接夏家窰橫貫湖中較北坡之迂省其半焉東  
行堤上一里半復有岡有橋有樓舍介水中央半里復遵堤  
上東行湖中遙顧四圍山色掩映重波間青蒲偃水高柳灩  
堤天然絕勝但堤有柳而無花橋有一二而無二六不免令  
人轉憶西陵耳又東二里湖堤旣盡乃隨港堤東北二里爲  
沐府魚池又一里半抵小西門飯於肆東過閘橋濱濠南而



東一里入城南舊寓問吳方生則已隔晚向晉寧矣已而見唐大來寄來行李書畫俱以隔晚先至獨方生則我來彼去爲之悵悵乃計復爲作書令顧僕往晉寧謝唐君別方生并向大來索陶不退書陶諱挺有詩翰聲向官於浙前大來欲爲作書聞其已故乃止適寓中有高士官從姚安來知其猶在皆虛傳如眉公也故復索書往見之

十一月初一日晨起余先作書令顧僕往投阮玉灣索其導游緬甸書併謝向之酒盒余在寓作晉寧諸柬須其反命卽令往南壩候渡下午顧僕去余欲入城拜阮仁吾令其促所定負擔人爲西行計適阮穆聲來顧已而玉灣以書來期明日晤其齋中遂不及入城

遊記

六册上  
滇四

三十一

初二日晨起余欲自仁吾處次第拜穆聲後至玉灣所忽玉灣來邀甚急余遂從其使先過玉灣則穆聲已先在座延於內齋欵洽殊甚旣午曰今日總府宴撫按當入內一看卽出故特延穆聲奉陪并令二幼子出侍客飲果去而卽返洗盞更酌已而報撫按已至玉灣復去囑穆聲必欵余多飲須其出而別余不能待薄暮託穆聲代別而返

初三日晨往阮仁吾處令促負擔人卽從其北宅拜穆聲留晨滄引入內亭觀所得奇石其亭名竹在余詢其故曰父沒時宅爲他人所有後復業惟竹在耳亭前紅梅盛開此中梅俱葉而花全非吾鄉本色惟一株傍亭簷摘去其葉始露面



目猶故人之免胄相見也。石在亭前池中，高八尺，闊半之，瓏  
瓏透漏，不瘦不肥，前後俱無斧鑿痕，太湖之絕品也。云三年  
前從螺山絕頂覓得，以八十餘人舁至，其石浮臥頂上，不經  
摧鑿而下，真神物之有待者。余昔以避雨山頂，徧臥石隙，烏  
覩有此類哉。下午過周恭先，遇於南門內，正挽一友來，顧知  
金公趾為余作送靜聞骨詩，相與同往，叩之，則金在其莊，不  
相值。金公趾名初麟，字頰肖，董宗伯風流公子也，善歌，知音律，家有歌童，聲伎其祖，乃甲科，父偉鄉薦，任江西萬安  
令公趾昔好客，某奏劾錢士晉軍門名在疏中，黜其青衿焉。其友遂留至其家，割雞為餉，

餽多烹牛，襍脯而出，甚精潔。其家乃教門，舉家用牛，不用豕也。其友姓馬，字雲客，名上捷，號閬仙尋甸府人，父以鄉科任沅州守。

遊記 六册上 滇四

當安會困黔省時，以轉餉功擢常德太守，軍興旁午，獨運援黔之餉，久而無匱，以勞卒於任。雲客其長子也，文雅蘊藉，有幽人墨士之風。是晚篝燈論文，雲客出所著拾芥軒集相訂，遂把盞深夜，恭先別去。余遂留宿其齋中，意外有紅梅一株盛放，此間皆紅梅，白者不植。中夜獨起，相對恍似羅浮，魂夢間然，葉滿枝頭，轉覺翠羽太多多耳。

初四日，馬君留晨，食恭先復至，對奕兩局，又留飯過午，乃出城，以為顧僕將返也。及抵寓，顧僕不見，而方生已儼然在樓，問何以來，曰：昨從晉寧得君書，即騎而來，送君騎向在當遲。一日復往晉寧，問昔何以往，曰：往新興，便道晉寧看君耳。問



顧行何在曰尚留晉寧候渡始知方生往新興以許郡尊考  
滿求雷太史左右之於巡方使君之側也雷名躍龍以禮侍  
丁憂於家巡方使

為倪子義  
係四川人

初五日方生為余作永昌潘氏父子書父名嗣魁號蓮峯丙  
子科第十名子名世

澄號未波丙  
子科解元騰越潘秀才書名一  
捷又為余求許郡尊轉作書

通李永昌永昌太守李還素昔自  
雲南別駕陞與許同僚又為余求范復蘇醫士江  
西人

轉作書通楊賓川賓川守楊大賓黔人號君山原籍宜興人  
以建平教中於南場與又生鄉同年也前

又生有書來然但知其家於黔而不知其宦於賓書為盜失  
并不知其家之所在但憶昔年與其弟宜興總練同會於又

生坐今不知其弟尚在宜興否憐余無貴其展轉為余謀勝余自為謀也下

午顧行自晉寧返并得唐大來與陶不退書阮仁吾所促負

遊記 六册上  
滇四

擔人亦至

初六日余晨造別阮玉灣穆聲索其所作送靜聞骨詩阮欲

再留款余以行李已出辭乃出叩任君任君大來妹婿大來

母夫人在其家并往起居之任固留飯余乃趨別馬雲客不

值留詩而還過土主廟入其中觀菩提樹樹在正殿陞庭間

甬道之西其大四五抱幹上聳而枝盤覆葉長二三寸似枇

杷而光土人言其花亦白而帶淡黃色瓣如蓮長亦二三寸

每朵十二瓣遇閏歲則添一瓣以一花之微而按天行之數

不但泉之能應刻州勾漏泉  
刻百沸而物之能測象如此亦奇矣土

人每以社日羣至樹下灼艾代灸言灸樹即同灸身病應灸



而解此固誕妄而樹膚爲之癩醫無餘焉出廟飯於任返寓周恭先以金公趾所書詩并贖至又以馬雲客詩扇至阮玉灣以詩冊并贖至其弟鎰亦使人餽贖焉追暮金公趾自莊還來晤知余欲從筇竹往曰余輩明晨當以筇竹爲柳亭余謝之曰君萬萬毋作是念明晨君在溫柔夢寐中余已飛屐峯頭矣不能待也是晚許郡尊亦以李永昌書至惟范復蘇書未至也

初七日余晨起索飯欲行范君至卽爲作楊賓川書余遂與吳方生作別循城南濠西行二里過小西門又西北沿城行一里轉而北半里是爲大西門外有文昌宮桂香閣峙其右

遊記 六册上  
滇四

三十四

頗壯又西半里出外隘門有岐向西北者富民正道向正西者爲筇竹寺道余乃從正西傍山坡南行卽前所行湖堤之北崖也五里其坡西盡村聚駢集是爲黃土坡城西則大塢自北而南以達滇海者也西行塢墜中二里有溪自西北注而南石梁橫其上是卽海源寺側穴湧而出之水遂爲省西之第一流云又西一里半有小山自西山橫突出反自南環北路從其北嘴上二里半西達山下有峽東向循之西上是爲筇竹出峽內越澗西南上是爲圓照由峽外循山嘴北行是爲海源先有一婦騎而前一男子隨而行者云亦欲往筇竹隨之悞越澗南上圓照至而後知其非筇竹也圓照寺



門東向層臺高敞殿宇亦宏而闐寂無人還下峽仍逾澗北令行李往候於海源余從峽內入一里半澗分兩道來一自南峽一自北峽二流交會處有坡中懸其西於是渡南峽之澗卽躡坡西北上漸轉而西一里半入筇竹寺其寺高懸於玉案山之北陲寺門東向斜倚所踞之坪不甚端稱而羣峯環拱林壑潌沓亦幽邃之境也入寺見殿左庖膾喧襍腥羶交陳前騎來婦亦在其間余卽入其後登藏經閣望閣後有靜室三楹頗幽潔四面皆環牆迴隔不見所入門因徘徊閣下忽一人迎而問曰先生豈霞客耶問何以知之曰前從吳方案案徵其所作詩詩題中見之知與丰標不異也問其爲

遊記

六冊上  
滇四

三十五

誰則嚴姓名似祖號築居嚴冢宰清之孫也爲人沉毅有骨澹泊明志與其姪讀書於此所望墻圍中靜室卽其栖托之所因留余人其中懇停一宿余感其意命顧僕往海源安置行李余乃同嚴君入殿左方丈問所謂未木亭者主僧不在鎖鑰甚固復還一段君亦識余言在晉寧相會亦忘其誰何矣段言爲金公趾期會於此金當卽至三人因同步殿右循堦坡而西北則寺後上崖復有坪一方其北崖環抱與南環相稱此舊筇竹開山之址也不知何時徙而下其處後爲僧塋有三塔皆元時者三塔各有碑猶可讀讀罷還寺公趾又與友兩三輩至相見甚歡窺其意卽前騎來婦備酒邀衆客



以筇竹爲金氏護施之所公趾又以夙與余約故期備於此而實非公趾作主人也時嚴君謂余其姪作飯於內已熟拉往滄之頃之住持僧體空至其僧敦厚篤摯有道行者爲余言當事者委往東寺監工修造久駐於彼今適到山聞有遠客亦一緣也必多留寺中毋卽去余辭以雞山願切此一宵爲嚴君強留者必不能再也體空謂今日諸酒肉漢混聒寺中明晨當齋潔以請遂出余欲往方丈答體空嚴君以諸飲者在退而不出余見公趾輩同前騎婦坐正殿東廂始知其婦爲伎而稱觴者余乃迂從殿南二門側曲向方丈體空方出迎而公趾輩自上望見趨而至曰薄醴已備可不必參禪

遊記 六册上  
滇四

三六

遂拉之去抵殿東廂則築居亦爲拉出矣遂就燕飲其婦所備肴饌甚腆公趾與諸坐客各歌而稱觴然後此婦歌歌不及公趾也旣而段君去余與築居亦別而入息陰軒迨暮公趾與客復攜酒盒就飲軒中此婦亦至復飛聲徵歌二鼓乃別去余就寢寢以紙爲帳卽嚴君之榻也另一榻亦紙帳是其姪者嚴君攜被襪就焉旣寢嚴君猶秉燭獨坐觀余石齋詩帖并諸公手書余魂夢間聞其哦三詩贈余余寢熟不能辨也

初八日與嚴君同至方丈叩體空由方丈南側門入幽徑游禾木亭亭當坡間林巒環映東對峽隙滇池一盞浮白於前



境甚疎窳有雲林筆意亭以茅覆窻櫺潔淨中有蘭二本各  
大叢合抱一爲春蘭止透二挺一爲冬筍花發十穗穗長二  
尺一穗二十餘花花大如萱乃赭班之色而形則與蘭無異  
葉比建蘭闊而柔磅礴四垂穗長出葉上而花大枝重亦交  
垂於旁其香盈滿亭中開亭而入如到衆香國中也三人者  
各當窻一隙踞窻檻坐侍者進茶乃太華之精者茶冽而蘭  
幽一時清供得未曾有禾木者山中特產之木形不甚大而  
獨此山有之故取以爲名相仍已久而體空新整之然目前  
亦未睹其木也體空懇留曰此亭幽曠可供披覽側有小軒  
可以下榻閣有藏經可以簡閱君留此過歲亦空山勝事雖

遊記 六册上  
滇四

三十七

澹泊知君不以羶來三人卒歲之供貧僧猶不乏也余謝師  
意甚善但淹留一日余心增歉一日此清淨界反成罪戾場  
矣坐久之巖君曰所炊當熟乞還滄之出方丈別體空公趾  
輩復來拉就殿東廂共滄鼎肉湯麪復入息陰軒飯巖君書  
所哦三詩贈余余亦作一詩爲別出正殿別公趾則行李前  
去爲體空邀轉不容行余往懇之執袖不捨公趾築居前爲  
致辭曰唐晉寧日演劇集賓欲留名賢君不爲止若可止余  
輩亦先之矣師曰君寧澹不羶不爲晉寧留此老僧所以敢  
留也余曰師意旣如此余當從雞山回爲師停數日蓋余初  
意欲從金沙江往雅州叅峨嵋滇中人皆謂此路久塞不可



行必仍歸省假道於黔而出遵義余不信及瀕行與吳方生別方生執裾黯然曰君去矣余歸何日後會何日何不由黔入蜀再圖一良晤余口不答而心不能自己至是見體空誠切遂翻然有不由金沙之意築居公趾輩交口曰善師乃聽別出山門師遠送下坡指對山小路曰逾此可入海源上洞較山下行近既別一里半下至峽中令肩行李者逾南澗仍來路出峽往海源寺余同顧僕逾北澗循澗北入卽由峽東向躡嶺一里逾嶺東稍東下半里折而北又半里已遙見上洞在北嶺與妙高相竝而路則踐危石歷巉磴而下下險卽由山半轉而北行半里有大道東南自海源上坡從之西北

遊記 六册上  
滇四

三八

上半里嶺上亂石森立如雲湧出再北遂得上洞洞門東向高穹軒迥其內深六七丈闊與高亦如之頂穹成蓋底平如砥四壁圍轉無嵌空透漏之狀惟洞後有石中突高丈餘有隙宛轉逾之而入洞壁亦嵌而下墜深八各二丈餘底遂窅黑墜隙而下見有小水自後壁滴瀝而下至底而水不見黑處亦漸明有樵者見余入駐外洞待之候出乃去洞中野鶴甚多俱巢於洞頂見人飛擾不定而土人設機關以取之又稍北共半里而得中洞洞門亦東向深闊高俱不及上洞三之一四壁亦圍轉無他岐惟門左旁列一柱又有二孔外透爲異耳余從洞前望往妙高大路自海源由山下村落盤西



山北嘴而西上洞前有如綫之路從嶺北逾峒而西卽從嶺頭行可省陟降之煩乃令顧僕下山招海源行李余卽從洞嶺北行期會於妙高洞北路若斷若續緣西山之半其下皆邨聚倚山之麓大路隨之余行嶺半一里有路自下邨直上西北逾嶺從之一里逾嶺西峯頭有水一塘在窪中由塘北西下一里山復環成高塢自南向北塢口石峯東峙嶙峋飛舞踞衆壑之交石峯北又有塢自西而東西塢重壑層疊有大山臨之其下路交而成蹊焉余望之行半里北下至石山之西又半里西抵西塢之底路當從西塢北崖緣峽而上余誤從西塢南崖躡坡而登一里逾嶺脊而西卽見西北層岡

遊記

六册上  
滇四

三九

之上有佛宇重峙余知卽爲妙高而下有深峽間隔路反折而西南已覺其悞循之行一里以爲當截峽北渡便可折而入寺乃墜峽西北下半里涉底復扳峽西北上以爲寺在岡脊矣而何以無路又半里及登脊則猶然寺前環峽之岡與寺尙隔一坑也岡上有一塔正與寺門對復從其東北下坑半里由坑底再上北崖則猶然前塢底緣峽處也北上半里岡頭有茶菴當道是爲富民大路菴側有坊沿峽端西循坡半入半里是爲妙高寺寺門東向前臨重峽後倚三峯所謂三華峯也三尖高聳積而成塢寺當其中高而不覺其亢幽而不覺其闌亦勝地也正殿左右俱有官舍以當富民武定



之孔道故寺中亦幽寂土人言妙高正殿有辟塵木故境不生塵無從辨也瞻眺久之念行李當至因出待於茶菴側久之乃從坡下上余因執途人詢沙朗道或云仍下坡自普擊大道而去省中通行之路也其路迂而易行或云更上坡自牛圈哨分岐而入此間間達之路也其路近而難知余曰既上豈可復下遂更上坡三里逶迤逾嶺頭卽循嶺北西向盤崖行又二里有小石峯自嶺北來與南峯屬有數家當其間是曰牛圈哨東西之水從此分矣從哨西直下則大道之出永定橋者余乃飯而從嶺脊北向行一里稍下涉壑卽從壑北上坡緣坡東北上回望壑底西墜成峽北走甚深路東北

遊記 六册上

滇四

四十

逾坡其東猶下滇池之峽也又一里半從嶺頭逾而北北行一里再逾一西突之坳其北遂仍出西峽上於是東沿山脊行又北一里半西瞰有邨當峽底是爲陡坡其峽逼仄而深陡此邨居之最險者從嶺上隨嶺東轉半里有路自東峒間透而直西遂墜西峽下此陡坡通省之道乃遵之東上半里逾峒東於是南沿山脊行又東半里稍東北下峽中半里有水一池瀆路南是爲清水塘在度脊之北塘北墜下墜成坑隨之北下一里過峽底有東來大道度峽西北去此卽自省會走富民間道也隨之復從峽西傍西山北行二里又轉而西遇一負薪者指北向從岐下峽中行將半里至其底卽



清水塘之下流也。又從峽西緣坡麓行，細徑斷續，亂崖崩墮。二里半，逾澗緣東麓，又北一里，乃出峽口。於是北塢大關南，北遙望，而東界老脊，與西界巨峯夾而成塢。始從畦塍北行，一里有溪，頗巨，自塢北來，轉而西去。余所從南來之水，亦入之。同入西南峽中，路北渡之。一里有邨，聚倚西山之麓，高下層疊，是爲沙朗。入邨，居停皆辭不納，以非大路故。亦昆明之習俗也。最後入一老人家，強主之，竟不爲覓米而炊。

初九日，令顧僕覓米具炊。余散步邨北，遙晰此塢東北，自牧養北梁王山西支分界，東界雖大脊，而山不甚高。西界雖環支而西北，有石崖山，最雄峻。又南爲沙朗西山，又南爲天生

遊記 六册上  
滇四

四十一

橋而南，屬於陡坡東峽之山。其山東西兩界，既夾成大塢，而南北亦環轉連屬。其中水亦發源於龍潭，合南北峽而成溪，西注於富民。螳螂然不能竟達也。從塢西南入峽，搗入山洞。其洞深黑，莫測穿山西出，與陡坡之澗合。洞上之山，間道從之。所謂天生橋也。然人從其上，行不知下有洞，亦不知洞之西透山之中空而爲橋。惟沙朗人耕牧於此，故有斯名。然亦皆謂洞不可入，有虎狼有妖祟，勸余由邨後逾山西上，不必向水洞迂折。余不從。既飯，乃南循坡麓行。一里半，與溪遇，遂同入西峽。其峽南北山壁夾而成路，由溪北沿北山之麓入。一里，仰見北崖之上，石壁盤突，其間駢列多門，而東一門高。



懸危瞰勢獨雄豁而磴跡甚微棘翳崖崩莫可著足乃令顧僕并行李俟於下余獨攀躍而上久之躋洞東見又一門側迸余以爲必中通大洞遂從其側倒懸入大洞門其門南向甚穹洞內層累北上深十餘丈而闊半之然內無旁竇卽前外見側迸之門亦不中達也出洞欲東上側門念西洞尙多旣下欲再探西洞望水洞更異遂直從洞下西趨水洞又半里西峽旣盡山環於上洞闢於下水從東來逼南崖搗西洞入路從其北墜岡下余令肩夫守行李於岡上與顧僕入洞洞門東向高十餘丈而闊半之始涉水從其南崖入水漱北崖而環之入五六丈水環北崖路環南崖俱西轉仰見南崖

遊記

六冊上

滇四

四十二

之上層覆叠出突爲危臺結爲虛樓皆在數丈之上氤氳闔闕與雲氣同爲吞吐從其下循之西入北崖尙明水漱之南崖漸暗路隨之西五六丈南崖西盡水從北崖直搗西崖下西崖遂下嵌成潭水鳴鳴其中作衝激聲遂循西崖北折去路乃涉水循東崖北向墮之洞轉而北高穹愈甚延納餘朗若昧若明又五六丈水漱北崖復西轉余亦復涉西涯於是水再環北崖路再環南崖竟昏黑不可辨但聞水聲潺潺又五六丈復西遇水其水漸深旣上不可見而下又不可測乃出出復四渡水而上岡聞岡上有人聲則沙朗人之耕隴者見余入洞與負行李人耦語待之爲余言水之西出卽陡坡



北峽山之上度卽天生橋間道所從如前之所標記者始恨不攜炬竟西從洞中出也其人又爲余言富民有老虎洞在大溪之上不可失余謝之乃西上躡嶺一里半登其脊是爲天生橋脊南石峯嶙峋高聳而出其脈自陡坡東度脊而北間道循其東陲陡坡之澗界其西麓至此又跨洞而北屬於沙朗後西山水從其下穿腹西出路從其上度脊西行脊西瞰卽陡坡澗水直走而北至此西折脊上之路亦盤壑西墜益信出水之洞卽在其下心懸懸欲一探之西行山半者一里見有岐直下峽底遂令顧奴同負囊者出大道直前余乃獨下趨峽中半里抵峽底遂溯水東行一里折而南則後洞

遊記 六冊上  
滇四

四三

龐然西向其高闊亦如前洞水從其中踴躍而出西與南來之澗合而北去余溯流入洞二丈後仰睇洞頂上層復裂通於門外門之上若橋之橫於前其上復流光內映第高穹之極下層石影氤氳若浮雲之上承明旭也洞中流初平散而不深隨之深入數丈忽有突石中踞浮於水面其內則淵然深隕磅礴崖根不能溯入矣洞頂亦有石倒竄以高甚反不覺其天矯其門直而迥故深入而猶朗朗且以上層倒射之光直徹於內也出洞還顧洞門上其左懸崖甚峭上復闢成一門當卽內透之隙乃涉澗之西遙審崖間層疊之痕孰可著足孰可倒攀孰可以宛轉達孰可以騰躍上乃復涉澗抵



崖一依所審法試之半晌遂及上層外門更廓然高穹也入其內爲龕爲窩爲臺爲榭俱浮空內向內俯洞底波濤破峽如玉龍負舟與洞頂之垂幄懸帔背仰望之而隱隱者茲如纓絡隨身幢幡覆影矣與躡雲駕鶴又何異乎坐久之聽洞底波聲忽如宏鐘忽如細響令我神移志易及下層崖懸級一時不得勝理攀挂甚久忽有男婦十餘人自陡坡來隔澗停睇追余下問何所事余告以游山兩男子亦儒者問其上何有余告以景不可言盡恐前行者漸遠不復與言遂隨水少北轉而西行峽中一里漸上北坡緣坡西行三里峽塢漸開又四里塢愈開其北崖逾山南下者卽沙朗後山所來道

遊記 六册上

滇四

四四

其南坡有聚落倚南山者是爲頭邨路至此始由塢渡溪溪上橫木爲橋其水卽陡坡并天生橋洞中所出西流而注於螳螂川者也從溪南隨流行一里過頭邨之西沿流一里半復上坡西行二里再下塢中半里路旁有賣漿草舍倚南坡則顧僕與行李俱在焉遂入飯又西盤南山之嘴一里餘爲二邨邨之西有塢北出橫涉而過之半里復上坡隨南山而西上倚危崖下逼奔湍五里有邨在溪北是爲三邨至是南界山橫突而北北界山環三邨之西又突而南塢口始西窒焉路由溪南躋北突之坡而上一里半抵峯頭其峯北瞰三邨溪而下溪由三邨西橫躡北峯之麓破峽西出峽深嵌逼



束止容水不容人故路逾其巔而過是爲羅鬼嶺東西分富  
民昆明之界焉過嶺西下四里通過上下羅鬼兩邨則三邨  
之流已破峽西出界兩邨之中而西又有一溪自北塢來與  
三邨溪合併西去路隨之行溪南二里抵西崖下其水稍曲  
而南橫木梁渡之有邨倚北山而聚是爲阿夷冲又從其西  
一里半逾一坡又一里半昏黑中得一邨亦倚北山是爲大  
哨覓宿肆不得心甚急又半里乃從西邨得之遂宿其家

初十日雞鳴起飯出門猶不辨色西南行膝中一里半南過  
一石橋卽阿夷冲溪所出也溪向西北流路度橋南去半里  
又一水自東南峽中來較小於阿夷冲溪卽志所云洞溪之

遊記 六册上  
滇四

四十五

流也二流各西入螳螂川度木橋一里餘得大溪湯湯卽螳  
螂川也自南峽中出東北直抵大哨西乃轉北去而入金沙  
江有巨石梁跨川上其下分五鞏上有亭其東西兩崖各有  
聚落成衢是爲橋頭過橋西北一里卽富民縣治由橋西溯  
川南行七里爲河上洞先是有老僧居此洞中人以老和尚  
洞呼之故沙朗邨人悞呼爲老虎洞余至此土人猶以爲老  
和尚也及抵洞見有刻爲河上洞者蓋前任縣君以洞臨溪  
流取河上公之義而易之甫過橋余問得其道而顧僕與負  
囊者已先向縣治余聽其前獨沿川岸溯流去一里西南入  
峽又三里隨峽轉而南皆瀕川岸行又二里見路直躡山西



立余疑之而路甚大姑從之一里遇樵者始知上山爲胡家  
山道乃上寨也乃復下瀕川而南一里其路又南上山余覘  
其旁路皆巖復隨之躡山南上愈上愈峻一里直登嶺脊而  
不見洞其脊自西峯最高處橫突而東與東峯壁夾川流祇  
通一綫者也蓋西岸之山南自安寧聖泉西龍山分支傳送  
而來至此聳爲危嶂屏壓川流又東北墜爲此脊以橫扼之  
東岸之山東自牛圈峭嶺分支傳送而來至此亦聳爲危嶂  
屏壓川流又西與此脊對而挾持之登此脊而見脊南山勢  
崩墜夾川如綫川自南來下嵌其底不得自由惟有衝躍脊  
南之路復墜淵而下以爲此下必無通衢而墜路若此必因

遊記

六册上

滇四

四十六

洞而闕復經折隨之下則樹影偃密石崖虧蔽悄非人境下  
墜一里路直逼西南高峯下其峯崩削如壓危影兀兀欲墜  
路轉其夾叻間石削不容趾鑿孔懸之影倒奔湍間猶窅然  
九淵也至是余知去路甚遠已非洞之所麗而愛其險峭徘徊  
不忍去忽聞上有咳聲如落自九天已而一人下見余愕  
然問何以獨踞此余告以尋洞曰洞在隔嶺之北何以逾此  
余問此路何往曰沿溪躡峭四十里而抵羅墓則此路之幽  
闕更非他徑所擬矣雖不得洞而覘此奇峭亦一快也返躋  
一里復北上脊見脊之東有洞南向然去川甚遠余知非河  
上洞而高攬南山凭臨絕壑亦超然有雲外想遂披棘攀崖



入之其洞雖不甚深而上覆下平倒插青冥呼吸日月此爲最矣凭憩久之仍逾脊北下一里抵麓得前所見翳路瞰川崖而南半里卽橫脊之東垂也前悞入南洞在脊南絕頂此洞在脊北窮峽洞門東向與東峯夾束螳川深嵌峽底洞前惟當午一露日光洞內之幽阻可知也洞內南半穹然內空北半偃石外突偃石之上與洞頂或綴或離其前又豎石一枝從地內湧起踞洞之前若湧塔然此洞左之槩也穹入之內崿峒窈窕頂高五六丈多翺翔卷舒之勢五丈之內右轉南入又五丈而窅然西穹闔黑莫辨矣此洞右之槩也余雖未窮其奧已覺幽奇莫過次第滇中諸洞當與清華清溪二

遊記 六册上

眞四

四十七

洞相爲伯仲而惜乎遠旣莫聞近復荒翳桃花流水不出人間雲影苔痕自成歲月而已出洞遂隨川西岸遵故道七里至橋頭又北一里餘入富民縣南門出北門無城堞惟土墻環堵而已蓋川流北向闢爲大塢縣治當西坡之下其北有餘支掉臂而東以障下流武定之路則從此臂逾岫北去川流則灣此臂而東北下焉時顧僕及行李不知待何所余踉蹌而前又二里及之岫臂之下遂同上峽中平逾其坳三里

有溪自西南山峽出其勢甚遙乃河上洞西高峯之後夾持而至東注螳川者其流頗大有梁南北跨之北上坡又五里飯於石關峭逾岫北下日色甚麗照耀林壑西有大山曰白



泥塘其山南北橫聳如屏插天土人言東下極削而西頗夷其上水池一泓可耕可廬也山東之水卽由石關峭北麓而東去共二里涉之卽緣東支迤邐北上其支從白泥東北環而南下者其腋內水亦隨之南下合於石關北麓路湖之北八里又逾其峒峒不甚峻田塍叠叠環其上邨屋亦夾峙是爲二十里舖又四里爲沒官莊又三里爲者坊關其處塢徑旁達聚三流焉一出自西南峽中者最大卽白泥塘山後之流也有石梁跨其上梁南屋廬卽者坊關也越梁西北上一里復過一邨廬又一小水自西峽來又一水自西北峽來二水合於邨廬東北稍東復與石梁下西南峽水合而東北去當亦入富民東北螳川下流者過邨廬之西北有平橋跨西峽所出溪上度其北遂西北上嶺其嶺蓋中懸於西北兩澗之中乃富民武定之界也盤曲而上者三里有佛宇三楹木坊跨道曰滇西鎖鑰乃武定所建以爲入境之防者又西上一里餘當山之頂有堡焉其居廬亦盛是爲小甸堡有歌肆在西隘門外遂投之而宿

十一日自小甸堡至武定府歇

季會明曰此後共缺十九日詢其從遊之僕云武定府有獅子山叢林甚盛僧亦敬客留憩數日遍閱武定諸名勝後至元謀縣登雷應山見活佛爲作碑記窮金沙江由是



出官莊經三姚三姚大姚縣姚安府姚州而達雞足此其大畧也余由十二月記憶之其在武定元謀間無疑矣夫霞客雖往而其僕猶在文之所缺者從而考之是僕足當霞客之遺獻云

裔孫 熙海南校字

遊記 六册上  
滇四

卑九



遊記第六冊下

江陰徐宏祖霞客著

子別姓

寄介立 輯

季夢良會明編

後學楊敦厚仲威

同邑

楊名時凝齋閱

族孫徐 鎮筠峪

重校

滇遊日記五

戊寅十二月初一日在官莊茶房時顧行病雖少瘥而孱弱殊甚尚不能行欲候活佛寺僧心法來同向黑鹽井迂路兩日

往姚安府以此路差可行不必待街子也

初二日初三日初四日在茶房悟空日日化米以供食而顧行孱弱如故心法亦不至

遊記 六冊下 滇五

一

初五日前上雷應諸蜀僧返諸僧待明日馬街隨街往爐頭出大姚余仍欲隨之而病者不能霍然為之怏怏 馬街在

西谿東坡上南去元謀縣二十五里北去黃瓜園三十五里東至雷應山箐口十里西至溪西坡五里當大塢適中處東

西抵山共徑十五里南抵山北逾江共徑一百三十里平塢之最遙者也其東南有聚廬曰官莊為黔府莊田茶房即在

馬街坡北 元謀縣在馬頭山西七里馬街南二十五里其直南三十五里為臘坪與廣通接界直北九十五里為金沙

江渡江北十五里為江驛與黎溪接界

江驛在金沙江北大山之南由其後北逾

坡五里有古石碑大書蜀滇交會四大字然此驛在江北其前後二十里之地所謂江外也又屬和曲州元謀北界實九



十五里而已。江驛向有驛丞，二十年來道路不通，久無行人。今止金沙江巡檢司帶管。直東六十里爲

墟靈驛。東嶺頭與和曲州接界，直西四十里爲西嶺，與大姚縣接界。其地北遙與會川衛直對，南遙與新化州直對，東遙與嵩明州直對，西遙與大姚縣直對。東界大山，卽墟靈驛與雷應山也。南自大麥地直北抵金沙江南岸，橫亘二百里，平障天半焉。西界山層疊錯出，亦皆自南而北。縣治之支南自楚雄府定遠縣東來，分支結爲縣治。其餘支西遶者，由縣西直北十五里，西溪之口而止，是爲第一層。又一支南自定遠縣分支來，與縣西之支同夾而北，至西溪口，東支已盡，此支更夾之而北，至扁擔浪而止，是爲第二層。又一支西自定遠

遊記 六册下 滇五

西與姚安府東界分支東來，與扁擔浪之支同夾而北。中界苴林後水，卽所謂西尖界嶺也。又一支西自姚安府東北分支東來，與西尖界嶺同夾而北。中界爐頭溪水，卽所謂爐頭西亂石岡也。又一支定遠縣西北妙峯山分支東來，與亂石岡同夾而北。中界河底之水，卽所謂舌甸獨木橋西山也。諸山皆夾川流北出，或合西溪，或出苴林，而下金沙，故自縣以北，其西界諸山，一支旣盡，一支重出，若鱗次而北，抵金沙焉。其東界水皆小，惟墟靈驛一支較大，南出馬頭山之南，經縣治東而北，與西溪合。自是以北，溪東之邨倚東界山之麓，甚多。官莊之北十里爲環州驛，又十里爲海關邨。濱溪東岸，卽活佛所生處。



離寺二十五里其邨有木棉樹大合五六抱縣境木棉樹最多此更爲大又十五里爲黃瓜園溪

西之邨倚西界山之麓亦甚多西坡下邨與官莊對峙北十五里爲五富邨又十里爲苴寧邨又北逾嶺二十里爲扁擔浪於是北夾西溪盡於金沙焉西界諸山俱自定遠夾流

分支東北而盡於金沙江其西北又有大山方頂矗峙於北與金沙北岸蜀滇交會之嶺駢擁天北從塢中北向遙望若

二眉高列於塢口焉余初以爲俱江北之山及抵金沙江上而後知江從二山之中自北而南環東山於其北界西山於

其西始知此方頂之山猶在金沙之南也其山一名方山象形

一名番山地以因其音之相近而名之其地猶大姚縣屬在縣

遊記 六册下 滇五

三

東北百四十里苴權之境東臨金沙江是此山又從西北北

勝州界環突東南界金沙於外抱三姚於中與此西界迴合而對峙爲門戶者也金沙巡司乃金沙江南曲之極處自

此再東過白馬口普渡河北口卽從烏蒙山之西轉而北下烏蒙馬湖巡司之西其江自北來故雲南之西北界亦隨之

而西北出以抵北勝麗江焉

初六日是早雲氣少翳諸蜀僧始欲游街子俟下午渡溪而宿明晨隨街子歸人同逾嶺旣晨餐或有言宜卽日行者悟

空以余行有伴辭不去而顧僕又以慊慊不能速隨諸僧後雖行心爲忡忡出茶房西一里半渡西溪溪從此西曲從其



南岸隨之。又一里餘抵西山。下溪折而北。又從其西崖傍山麓隨之。又北一里餘。有邨當路北。遂由其南西向入峽。半里涉枯澗。乃躡坡上。其坡突石。皆金沙燧燧。如雲母堆疊。而黃映有光。時日色漸開。躡其上。如身在祥雲金粟中也。一上二里。逾其頂。望其西。又闢一界。有尖山獨聳。路出其間。乃望之。而趨西向漸下。三里抵塢中。有水自南峽中來。至此遶塢東北去。其水不深而闊。路北數十家倚河東岸。由其南渡河而西。其處木棉。其有高一丈餘者。云兩三年不凋。有枯澗自西來。其中皆流沙。沒足兩傍。俱迴崖巨壁。夾持而來。底無滴水。而沙間白質皚皚。如嚴霜結沫。非鹽而從地出。疑雪而非天降。則硝之類也。路當

遊記 六册下 滇五

四

從澗底直入。諸僧之前驅者。誤從南坡躡嶺上。上一里。見其路愈南。而西尖在西。知其誤。乃與僧西北望澗底。攀崖下墜。一里復循底西行。見壁崖上懸金丸累累。如彈貫叢枝。一墜數百。攀視之。卽廣右所見顛茄也。志云枝中有白漿。毒甚。土人鍊爲膏藥。著物立斃。

行澗底二里。其底轉自西北來。路乃從西南躡嶺。一里半。盤嶺頭西出。又一里半。西南下坡。其處開壑。澗環而北。涉壑底而西。不見有水。半里循西坑入。見石峽中有水。潏潏其峽甚逼。水亦甚微。一里其峽有自南流而出者。下就涉之。其流之側有窞如半匏。仰東崖下。涵水一盂。不流不竭。亦潏水之靜。而有常。不與流俱汨者也。涉細流西上。逾坡半里。有植木爲



坊者上書黔府官莊西下半里有數家在坡北其壑亦灣環而北中有田塍數十畦想卽石峽之上流得水如綫遂開此畦所謂黔府莊田是也時諸僧未及攜澆令其徒北向尋家覓火余輩隨大道遶其南而西一里又有木坊在西坡書亦如前則其西界也從此西下又涉一枯澗遂西上嶺其上甚峻前乞火僧攜火至而不得泉莫能爲炊上嶺二里盤峽而西又半里轉而南半里一坪北向環窪中亦無水余乃出所攜飯分啖之隨坪稍南半里復西上其上愈峻二里登岡頭以爲逾嶺矣而不知其上乃東垂之脊也望西尖尙在其北隔一深坑甚遙西尖又有南北二橫山且其兩頭又自成一

遊記

六册下  
滇五

五

界焉從脊向西行二里半又南轉峽上循而環之又西北上再陟峻嶺二里登岡頭又以爲逾嶺矣而其上猶東垂之脊也又從脊西向行於是脊兩旁皆深墜成南北壑壑蟠空於下脊端突起於外西接橫亘之界樹叢石錯風影颯颯動人疑是畏途時肩擔者以陟峻難前顧僕以體弱不進余隨諸僧後屢求其待之與俱每至一嶺輒坐待久之比至諸僧復前彼二人復後余心惴惴旣恐二人之久遲於後又恐諸僧之速去於前屢前留之又後促之不勝惶迫愈覺其上不已也從脊行三里復從嶺西上一里遂陟橫亘南山之北巔其巔與中突之尖南北相對上有石臺垣橫界是爲元謀東界



大姚西界卽武定姚安二府所分壤處也。路由其間，登巔之絕處，則有盤石當頂，於是從南橫之巔南向，陟其脊，東瞰元謀西瞰爐頭兩界，俱從履底分塢焉。南行脊上二里，西向下二里，路側漸墜成峽，石坎累累，尙無滴水。歷石坡直下，一里抵峽中，峽西又有迴岡兩重，自東北而蟠向西南，於是涉峽盤岡，再逾坡兩重，共七里，乃西南下嶺，一里始及其麓。其塢乃南北大開，中有溪界之望，見溪西有大聚落，是爲爐頭時。諸僧已飢，且日暮，急於問邸，遂投東麓下草廬家宿。

初七日，土人言自爐頭往獨木橋，路止四十里，不及官莊來三之一。余信之，時顧僕奄奄，諸僧先飯而去。余候顧僕同行。

遊記

六冊下

滇五

六

是早陰翳如昨，西望爐頭大邨，行半里，渡一北流溪，又西一里餘，直抵西界山麓，又有一溪頗大，自南峽中來，渡之，北上崖卽爐頭大邨也。其溪環邨之前，轉而北去，爐頭邨聚頗盛，皆瓦屋樓居，與元謀來諸邨迥別。其西復有山斜倚，循其東麓西南湖流行，三里逾一東突之坡，乃南下半里，涉塢一里，又南涉坡而上，其坡自西而東突，與北坡東向環成中塢，溪流北注於前，田塍環錯於內，陟南坡一里，見溪東又盤曲成田，倚東山爲塢，由坡西南行一里，下坡，溪自北而南，乃橫涉之，登其西崖，則見所涉之北，其溪復自北來，有支流自北峽來者，小水也。從崖西行，已復逾溪之南岸，溯溪上，溪在北峽。



有數家倚其南岡從其中西行二里北峽兩崖對竦石突如門其北崖石半有流環其腰土人架木度流引之南崖沸流懸度於上亦奇境也路循南崖之腰盤崖西下又半里則其溪又自南而北南北俱削崖峙門東西又危坡夾塹境奇道險渡溪又西上坡半里躡坡南則復逾溪之北崖溯溪上西二里一峯危突溪西溪身自其南環峽而出支溪自其北塹壑而下有岐西渡支溪直躡西峯者小路也自支溪之東崖陟坡循峽而北入者大道也余乃從大道北上坡半里由坡峽平行一里隨峽折而北路緣塹木叢路旁幽箐深崖令人有鳥道羊腸之想一里餘峽漸從下而高路稍由高而下兩

遊記 六册下  
滇五

七

遇之遂西陟峽中細流復從峽西躡峻西上卽盤而北乃知是爲中懸之岡其西復有峽流自北來與所涉之峽流卽會於岡前緣岡北上一里左右顧瞰其下皆峽而流貫其中斯岡又貫二流之中始覺西尖之嶺峯隆泉縮不若此之隨地逢源也從岡脊北向以漸上躡亦以漸轉西二里登岡之首望其岡猶自西峯東突而下者蓋山脊自西南來至此旣穹南山一重卽從其北峽中度而北再起中峯又且爲此山一重卽從其北嶺環支而東又且爲北山一重恰如川字條支東南走而所上者是其中支也從岡首又西向平行二里直抵其西中峯最高之下乃循其峯之東崖西南上一里半是



爲亂石岡遂凌其峯之崖下瞰南峽之底卽其中度處也峽中之水遂東西分焉由嶺崖最高處西轉而下逶迤曲折下四里復從岡上西北行忽見岡左右復成溪而兩夾之其溪流分大小平行岡上二里卽從其端下西渡大溪由溪西上坡稍轉而北半里從北峽轉西遂向西塢入於是溯西來大溪之北循北山西行矣二里半有邨在溪南倚南山之坡北山亦至是南突路遂從所突峽中上乃踞峽石而飯又一里盤其南崖從崖轉西又一里逾其西峽乃西下坡半里抵坡之西麓其西復開成塢半里路循谿北之山又有邨倚溪南之麓與前倚溪南之坡者皆所謂夷邨也西行三里一溪自

遊記

六册下  
眞五

八

南峽來路亦隨之南轉稍下渡西來小水從南坡西上二里逾其峽西北下一里下至壑中其壑南向而大山環其北又有小水東南流當亦下大溪者而大溪盤其東南峽中不見也渡小水又西上一里透西峽出始見西塢大開大溪貫其中自西而東抵所透峽南破其峽壁東去其峽逼東甚隘迴顧不能見西下坡半里抵塢中遵溪北塢西行半里過一小邨又西一里忽塢墜間蹇蹇爲衢半里遶大邨之前又西半里抵邨創新橋而止是爲大舌甸邨其塢夾溪爲田塢環而田甚闢其邨倚山爲衢邨巨而家甚古蓋李氏之世居也邨後一山橫擁於北又一山三峯遞下斜突於西南有小流自



其峽中出由邨西而南入大溪架橋其上西逾之遂循斜突南峯下西南行二里抵其西垂則大溪自南直搗其麓乃逾堰東向其麓爲水所齧石崖逼削幾無置足處歷堰之西上流亭洄自南而北路從其西轉而南入峽又行南峽一里餘則有石梁一輦東西跨溪上是爲獨木橋路從橋西直南上坡其逾橋而東者乃往省大道是橋昔以獨木爲之今易以石有碑名之曰躡雲而人呼猶仍其舊焉橋側有梅一株枝叢而幹甚古瓣細而花甚密綠蒂朱蕾冰魂粉眼恍見吾鄉故人不若滇省所見皆帶葉紅花盡失其雪滿山中月明林下之意也乃折梅一枝少憩橋端仍由其西上南坡隨坡西

遊記 六册下 滇五

九

轉蓋是溪又從西塢來至是北轉而逾石堰是坡當其轉處其南又開東西大塢溪流貫之路溯溪北崖循北山西行一里有聚落倚北山下是爲獨木橋邨有寺當邨之中其門南向其處邨無旅店有北京僧接衆於中余乃入宿

初八日晨起寒甚顧僕復病余亦苦於行止行一里遂憩水井屯寺中

初九日出寺一里半過口家莊半里轉南半里倉屯橋二里半泗峽口轉西五里王家橋

有小水北來

五里李東橋

有西北西南二小水

西上山十里至春轉南半里廟山營西下半里廟前打哨西下二里有岐轉北岫一里復西隨平峽北二里又西下二里



至峽底西平行一里半復於峽北上二里轉北岫而西又北半里過一峽脊又北下半里又北度一峽底又西上坡一里轉而北又一里轉而西下一里至脊間又西二里餘乃下脊一里餘抵其北曰小犵老邨始有田有池又西四里抵西山下有邨轉南一里西過一小岫又半里西南過新壩屯又西半里過新壩橋又西一里轉而南二里盤西山嘴轉而西北一里餘入大姚東門半里過縣前又西南至旅肆歇

初十日早寒甚出北門半里經南門轉而西南上坡一里有橋跨溪上曰南門橋志曰承恩過橋南上坡一里登坡倚西山南

行三里其塢自南來有塔在塢東北山上乃沿西山南下半

遊記 六册下 滇五

里抵塢底又半里見有水貫塢中石梁跨其上名土橋卽姚安水從西南峽中來向東北峽去橋北爲大姚橋南爲定遠蓋以是水爲界也從橋南上坡有邨爲定遠屯入峽漸上一里東轉半里上坡半里由坡南轉一里是爲賴山哨於是南下一里抵東南坡頭有岐南行者爲姚安府路有海子在東東行者爲赤草峯路逾坡東下一里爲赤草峯北邨由邨轉南溯溪行一里度橋而南半里墮赤草峯街子南行一里乃東上山一里半逾嶺東南下其東又有塢自西而北甚遙下坡半里由西山東麓南行二里邨落傍溪左右皆爲犵老邨此定遠所屬又東一里半始傍西水岸南行半里東度小橋



遂由東麓南行二里至鹿家邨後遂東上山山半有岐路從岐入峽半里渡溪東北上二里至妙峯山德雲寺寺門西向南望烟蘿後有夢菴亭後五里碧峯菴

十一日待師未歸看藏

宗景慧大師西方合論

十二日飯仍西下山二里南行二里隨塢西轉二里有橋跨溪上曰梁橋度其北卽犵老邨盡處也其水自南來入路從邨西上嶺一里半逾岫西行嶺上半里有岐從西南下誤從坡上直西半里乃改從岐西南行半里漸下轉南又一里乃南下半里抵峽中隨峽南去半里有大路隨東峽來小水隨之西半里入南峽一里有池在峽中又一里半峽分兩岐從

遊記

六册下

滇五

十一

西南者倚東嶺平上一里南逾岫由岫轉而西始見西塢大開西南有海子頗大其南有塔倚西山下是卽所謂白塔也乃西南下坡二里有邨在坡下曰破寺屯於是從岐直西小路一里渡溪稍西南半里有一屯當溪中山遶其北其前有止水由其西坡上南行一里是爲海子北堤由堤西小路行半里抵西坡下是爲海口邨轉南隨西山東麓行名息夷邨海子三里海子西南盡有路直抵大山下半里爲高土官家由其西南入峽中上坡一里半有神廟當坡峽間又上半里活佛寺臨其後其西大山名龍鳳山又名廣木山寺號龍華僧號寂空是日下午寂空留止後軒東廂其後有深峽下懸



峽外卽危峯高峙庭中藥欄花砌甚幽墻外古梅一株花甚盛下臨深箐外映重巒是夜先訂寂空明晨欲早行求爲早膳 白塔尚在寺東南後支岡上岡東有白塔海子其南西山下又有陽片海子其東又有子鳩海子府城南又有大壩雙海子與息夷邨共五海子

十三日昧爽起飯而下山二里仍出土官家後遂轉南行一里過格香橋有小水自活佛寺後峽中來者此峽正與白塔之岡中格而對峙又南二里有岡自西界東突而出路盤其東垂則又一海子匯其東南從海子北堤東向行半里隨堤南轉一里半抵海子東南盡處遂東南行四里有岡自西而

遊記

六册下  
滇五

十二

東突是爲龍岡衛盤岡東皆大聚半里過聚東行一里復南二里曲度乾底復南二里則西山一峯復突其南遂漸抵東山則南北成兩界焉又南五里而入姚安府北門歇青蓮菴青蓮碑記曰東煙蘿西金秀南青蛉北曲折 姚安府南

隨峽上一百四十里鎮南州東逾大山一百四十里定遠縣西逾小坡一百二十里北隨大塢下一百二十里白鹽井

姚安東西兩界皆大山夾抱郡城當其南西界最闊直北二十五里兩界以漸而東各有支中錯如門戶焉中有小水西自鎮南州界北來至郡北屢堰爲湖下流達北峽之門而出所謂青蛉川也



十四日飯於青蓮循城南一里半爲觀音寺轉北過西門共一里抵舊西門二里半抵西麓是爲古寺山以有古寺在山之東半也卽志所稱祥龜寺也二里逾頂下其西環塢北口則羊片湖在焉西下一里半行塢中一里半有坊當塢中曰羊片屯西過半里轉南半里又西南半里抵小山之麓從其南塢西入一里半又西上一里半有岐焉西北者入山樵牧者所經西南盤嶺者大道也盤嶺上一里半逾其頂是爲當波院而實無寺宇乃南來之脊北度而東爲古佛寺大山及大姚西界諸山也於是西南下二里有小水南流隨之南入箐又東一里半轉而西一里半峽始開稍北盤岫一里復西

遊記 六册下

演五

十三

南下坡三里峽中溪自南而北注有橋跨之度橋遂循西山南向湖水行二里飯於邨家又南向行二里餘其峽自西來轉水亦從之於是折而入是名觀音箐箐中止容一水西湖之八二里有觀音堂其前堰水甚泓澈其側石亦嶮呀又西三里乃南上山甚峻二里陟其脊乃東南下一里抵峽中遂循坡西南下二里抵聚景橋橋上有亭橋下水乃西來小流也過橋三里是爲彌興居集甚盛又南半里轉西一里餘有公館神廟在岡上由其前西南半里轉而西於是連逾三坡下陟三峽共九里有邨懸西坡上是爲孫家灣宿

十五日昧爽飯而行霜寒殊甚南上坡溯小流入五里盤一



坡坡下有洞甚束其東北人家曰尾首邨稍西轉南是爲龍馬箐三里。有哨當澗東坡上是爲龍馬哨有哨無人。山壑幽阻溪環石隘樹木深密。一路梅花幽香時度。又南一里隨峽轉西一里有一峽自南來甚深隘。一峽自西來仍循北山行西來峽上一里出峽乃成塢焉。西向平下一里有邨當其西是爲大大苴邨。西行二里抵西山下遂西上坡半里逾峒北下陟塢西北半里是爲小大苴邨。由其南半里轉而北上坡循西峽行二里下渡澗中小水卽西上嶺甚峻三里半逾嶺頭西行脊上或南峽上又臨北峽再平再上三里餘則盤西嶺之東北轉二里逾其脊此最高處也。東望烟蘿東界尖山

遊記 六册下  
滇五

十四

在錢章關者隱隱連妙峯而西界南突之山亦見。惟北望活佛寺大山反爲孫家灣後山所隔不可見。又西二里當西突之處有人守哨焉。是爲老虎關哨。稍西下半里行坡間一里半是爲打金莊牌界。又西一里半逾坡。又西上一里半是爲絕頂有公館東南之峽。至是始窺其脈自南天申堂後直北分支來。東度老虎關而北。於是西向稍下半里度一坡半里。逾其巔從巔西行一里遂西望四十里外層山一重西遶。又高峯一帶南環者皆大脊也。其東有小脊二重內隔外有遠峯二抹。西浮不知爲點蒼爲雞足也。於是西下頗坦五里下至峽中是爲五里坡。有水自南而北。小石梁跨之。度而西盤



西山南峽入一里又躡坡而上。一里凌其巔。一里半稍下平  
行嶺上。二里餘西向下。有溪自西南來北向去。亦石梁跨之。  
是爲普昌河西上坡半里爲巡司半里。復上一山脊。由脊西  
行四里。乃下一里而抵普湖。

十六日由普湖西北行。二里渡一水。一里又渡一水。乃西上  
坡。二里逾坡上。一里脊上平行。三里爲金雞廟。又西二里爲  
界坊。乃姚州小雲南界。又西行嶺上五里。至水盆哨。乃西北  
稍下。卽見南界水亦西流。出鼻窻。而下元江矣。乃隨北山  
臨南峽西行。二里山坑南墜。峽路隨西脊過。有邛當脊間。是  
爲水盆舖。蓋老龍自西南來。從此脊北度。峙爲一峯。其東南

遊記

六册下  
慎五

十五

又折而南爲水盆舖。惟中央一綫南流。下元江云。舖西北上  
有關帝廟。就而作託。聽顧僕同行李先去。久之乃隨大道西  
二里。則嶺北山下。亦下墜成西向之峽。□□□□□□□□  
□峽北所起尖山。是爲青山。至是其西橫拖而去。於是循南  
峽之頂西行。二里忽見路北墜。峽西去。路由其峽南嶺脊行。  
於是與峽北之尖山。又對峽分流。西注雲南。而北下金沙矣。  
始知大脊自九鼎南下。至洱海衛城南。青華洞度東。又聳而  
南。爲水目山。其南又東轉爲天華山。卽雲南川南兜之山也。  
從天華東北轉。數起而爲沫滂東嶺。又東過公館而度水盆  
舖。北聳爲青山。其形東突而西垂。川中故自打金莊嶺望之。



僅爲北尖峯而至此又橫夾而西然是山西北二支皆非大脊也夫脊卽從東南水盆峭過脈遂東南迤邐於天申宮南又東至沙橋站分脊焉所過水盆峭舖之南間相去不過二里忽度其脊南又度其脊北至由峽南嶺稍上稍下西南二里公館當其頂又西下西上再從嶺脊西行八里脊自西南來至此稍突而北乃轉而北緣之二里又西南下始追及前行行李於是遂出山之西崖見其西塢大開於是直下五里及麓爲沫滂舖西截塢八里有二石梁東西跨其下皆涸而川水實由之北注又西二里過大水堰塘堰稍北復西十里抵西山下爲小雲南驛宿。

遊記 六册下  
滇五

十六

十七日味爽飯詢水目寺在其南遂由岐隨山之東麓南行盤入其西南塢中共五里有水自山後破峽南出卽洱海衛青海子之流也是爲練塢塢在水西渡橋西復沿山而南一里半爲湍泉其穴西向待浴婦經雨時乃浴仍南沿西麓半里又盤其山之南塢入有溪自塢東出卽水目之流也始見水目山高峙於西湖水西入見其西又大開南北之塢橫截其間五里抵西山麓有邨甚大曰冉家屯由其後西向上山於是有溪流夾邨矣西上逾一嶺二里稍下涉一澗其澗自南而北溯之南上山間茶花盛開又二里餘爲水目寺余誤從其南大路幾逾嶺遇樵者轉而東北下半里入玉皇閣



又下觀倒影又下過普賢寺又下遇行李於靈光寺遂置於  
寺中樓上慧然乃西至舊寺訪無住方在上新建住靜處不值  
舊寺有井有大香樟有木犬有風井有塔由其後上無影菴  
飯於妙忍老僧靜室暮過觀音閣觀淵公碑乃天開十六年  
楚州趙祐撰者

十八日往無住處午過徽僧戒月靜室飯下午觀慧然新樓  
花卉

十九日早雨雪無住苦留因就火僵臥上午雨雪倏開再飯  
由山前東北下五里下山過一邨北向二里逾一坡又二里  
過一小海子其北岡上有數家曰酒藥邨一里越之乃陟塢

遊記 六册下  
滇五

十七

循東山北向行五里卽青海子之西南涯也遂與小雲南來  
之大道遇於是由青海子西涯西北向行八里則南山再突  
而北瀕於海路或盤之或逾之又五里爲狗邨舖坊名瑞禾  
館名清華其處北向洱海衛城八里西向白崖城站四十里  
余從西路四里觀清華洞洞北有路西過嶺此白崖道洞南  
有塢南過春此滅渡道余出洞循西山仍北行六里入衛城  
南門顧僕亦至出西門宿

二十日飯而行猶寒甚而天復霽由西門北向循西山行五  
里抵一邨其北有水自西峽出遂隨之入一里餘稍陟坡一  
里餘有邨在澗西曰四平坡北轉五里渡溪橋又北上三里



爲九鼎山寺。又二里陟其巔。飯下午。從東北下。三里過北溪橋。仍合大路。循梁王山西麓。西北溯流入。五里梁王邨。北八里。松子哨。行半里。溪西去。路北。上。半里逾嶺。又東北下者五里。則溪復自西來。又有一小溪自幕山北麓來。與之合。乃涉其交會處。是爲雲賓之界。又東二里。爲自北關。已暮。又東二里半。渡澗橋之北。又東半里。轉北一里半。爲山岡鋪宿。

二十一日平明行。大塢中。北向十里。其西爲賓居。又北五里。有小水出口。間。又北三里。有澗自西峽出。隨之北。二里爲火頭基。西北連渡二溪。又北五里。總府莊。又北三里。賓川州在東坡上。東倚大山。西臨溪流。然去溪尚里許。其濱溪東岸者。

遊記

六册下  
滇五

十八

曰大羅城。令行李先去。余草記西崖上。望州北有岡。自東界突而西。其北又有岡。自西界突而東。交錯於塢中。爲州下流之鑿。溪至是始曲折。鑿之始得見其形焉。又北三里半。逾東突之岡。則見有邨。當其北麓。是名紅帽邨。溪自東南滌東突之岡。西轉而滌於邨之前。其前又開大塢。北去。仍循西山北行。五里。漸轉而西。於是岐分爲二。東北隨流。遵大塢直去。者由牛井街通浪滄衛道。西北從小塢逾嶺。者由江果往雞足道。余初由山岡鋪北望。以爲東界大山之北。橫卽雞足。而川中之水。當西轉出瀾滄江。至是始知賓川之流。乃北出金沙江。所云浪滄衛。而非瀾滄江也。其東界大山。乃自梁王山北。



轉夾賓川之東而北抵金沙非大脊也從小塢西二里逾西  
界之脊始見雞足在西其高與東界竝然東界尤屏巨與雷  
應同橫穹半壁云從脊上南望其南五德山橫亘天南卽前  
洱海衛所望九鼎西高擁之山其上有雪處也至是又東西  
橫峙其東又聳幕山所謂梁王山也二山中均稍低卽松子  
哨度脊而北處也從嶺西行三里稍北下有溪自西而東注  
於賓川大溪架梁其上覆以亭是爲江果邨在溪北岸其流  
與火頭基等時日甫下午前向東洞尙三十五里中無托宿  
遂止。

二十二日味爽由江果邨飯溯溪北岸西行其溪從西峽中

遊記 六册下  
滇五

十九

來乃出於雞山南支之外五福之北者洱海東山之流也四  
里登嶺而北寒風刺骨幸旭日將升惟恐其遲盤嶺而北一  
里半見嶺北又開東西塢有水從其中自西而東注於賓川  
大溪卽從牛井街出者此塢名牛井有上下諸邨其水自雞  
足峽中來所謂盒子孔之下流也於是西向漸下一里半而  
抵塢中又西一里過塢中邨後有坊曰金牛溢井標勝也土人  
指溪北岡頭有井在石穴間又西二里復逾岡陟峽蓋其山  
云是昔年牛從井出處也

皆自南突北瀕溪而止溪東流滌之一開而爲煉洞再開而  
爲牛井此其中突而界之者盤峽而上迤邐西北再平再上  
五里越嶺而復得塢稍下一里半有坊在坡曰廣甸流芳又



一里半復過一邨後此亦煉洞最東南邨也又北二里有邨  
夾道有公館在邨頭東北俯溪是爲煉洞之中邨其北二里  
復上嶺二里越之而北有坊曰煉法龍潭始知其地有蟄龍  
有煉師此煉洞所由名也又北二里邨聚高懸中有水一池  
池西有亭覆井卽所謂龍潭也深四五丈大亦如之不溢不  
涸前瀕於塘土人浣於塘而汲於井此雞山外壑也登山者  
至是以爲入山之始焉其邨有親迎者鼓吹填街余不顧而  
過遂西北登嶺五里有菴當嶺是爲茶菴又西北上一里半  
路分爲二一由嶺直西爲海東道一循峽直北爲雞山道遂  
北循之稍下三里而問飯發筐中無有益爲居停所留也又

遊記 六冊下  
滇五

二十

北下一里有溪自西南峽中出其峽迴合甚窅蓋雞足南峽  
之山所洩餘波也有橋亭跨兩崖間越其西又北上逾嶺一  
里有哨兵守嶺間又北一里中壑稍開是爲拈花寺寺東北  
向余餒甚入索飯於僧隨寺北西轉三里逾岡之脊是爲見  
佛臺由此西北下一里又涉一北下之峽又西逾一北下之  
脊始見春西有塢北墜塢北始逼雞山之麓蓋雞山自西北  
突而東南塢界其中至此塢轉東北峽路盤其東南支乃谷  
之縮會處也西一里見有坊當道左跨南山側知其內有與  
異訊之牧者曰其上有白石崖須東南逾坡一里乃得余乃  
令行李從大道先向雞山獨返步尋之曲折東南上果一里



得危崖於松箐之間崖間有洞洞前有佛宇門北向鑰不得入乃從其西逾窰徑之棘以入遍游洞閣中又攀其西崖探閣外之洞見其前可以透植木而出乃從之下一里仍至大路又西北二里下至塢中渡溪是爲洗心橋雞山南峽之水西自桃花箐南自盆子孔出者皆由此而東出峽東南出煉洞牛井而合於賓川者也溪北雞山之麓有邨頗盛北倚於山是爲沙址邨此雞山之南麓也於是始迫雞山有上無下矣從邨後西循山麓轉而北入峽中緣中條而上一里大坊跨路爲靈山一會坊乃按君宋所建者於是岡兩旁皆澗水泠泠喬松落落北上盤岡二里有岐東北者隨峽西北者逾嶺逾嶺者西峽上二里有瀑布隨峽者東峽上二里有龍潭瀑之北卽爲大覺潭之北卽爲悉檀余先皆不知之見東峽有龍潭坊遂從之盤磴數十折而上覺深窅險峻然不見所謂龍潭也逾一板橋見塢北有寺詢之知其內爲悉檀前卽龍潭今爲壑矣時余期行李往大覺遂西三里過西竺龍華而入宿於大覺

二十三日飯於大覺卽東過悉檀悉檀爲雞山最東叢林後倚九重崖前臨黑龍潭而前則迴龍兩層環之先是省中諸君或稱息潭或稱雪潭至是而後知其皆非也宏辨安仁二師迎飯於方丈卽請移館余以大覺遍周以足疾期晤於是



欲少須之乃還過大覺西上一里入寂光寺住持者留點此  
中諸大刹惟此七佛殿左右兩旁俱闢禪堂方丈與大覺悉  
檀並麗又稍西半里爲水月積行二菴皆其師用周所遺也  
二十四日入晤遍周方留款而宏辨安仁來顧卽懇移寓遂  
同過其寺以靜聞骨懸之寺中古梅間而入問仙陀純白何  
在則方監建塔基在其上也先是余在唐大來處遇二僧卽  
殷然以瘞骨事相訂及入山見兩山排闥東爲水口而獨無  
一塔爲山中欠事至是知仙陀督塔工而未知建於何所宏  
辨指其處正在迴龍環顧間與余意合飯後遂東南二里登  
塔基晤仙陀

遊記

六册下  
滇五

二十二

二十五日自悉檀北上經無息無我二菴一里過大乘菴有  
小水二派一自幻住東一自蘭陀東俱南向而會於此爲悉  
檀西派者也從二水之中躡坡上二里餘東爲幻住今爲寧  
福寺西岡爲蘭陀幻住東水卽野愚師靜室東峽所下與九  
重崖爲界者幻住西水卽與良一蘭陀寺夾塢之水自上莘  
野靜室發源於念佛堂而爲獅子林中峽之水也循東岡幻  
住旁北向一里而得一靜室卽天香者時中無人入訊莘野  
廬小沙彌指在盤崖杳藹間當危崖之西乃從其後躡崖上  
穿林轉磴俱在深翠中蓋其地無喬松惟雜木續紛而疊路  
其間又一景矣數十曲幾一里東躡岡卽野愚廬西緣崖度



峽卽莘野廬道於是西向傍崖橫陟半里有一靜室高懸峽中戶扃莫入是爲悉檀寺庫頭所結由其前西下蘭陀寺躡其後而上又半里而得莘野靜室時知莘野在牟尼山而其父沈翁在室及至而其門又扃知翁別有所過莫可問遂從其左上又得一靜室主僧亦出有徒在詢之則其師爲蘭宗也又問沈翁何在曰在伊室問室何扃曰偶出當亦不遠余欲還以省中所寄書畀之其徒曰恐再下無覓處不若留此代致也從之又從左峽過珠簾翠壁躡臺入一室則影空所栖也影空不在乃從其左橫轉而東一里入野愚靜室所謂大靜室也有堂三楹橫其前下臨絕壁其堂窓櫺疎朗如浮

遊記 六册下  
滇五

二十三

坐雲端可稱幽爽室中諸老宿具在野愚出迎余入詢則蘭宗影空及羅漢壁慧心諸靜侶也是日野愚設供招諸靜侶遂留余飯飯後見余攜書篋因取篋中書各傳觀之蘭宗獨津津不置蓋曾雲游過吾地而潛心文教者旣乃取道由林中西向羅漢壁從念佛堂下過林翳不知竟平行而西共一里半有龕在磐石上入問道從其西南半里逾一突嘴卽所謂望臺也此支下墜卽結爲大覺寺者望臺之西山勢內遜下圍成峽而旃檀林之靜室倚之峽西又有脈一支自山尖前拖而下是爲梅檀嶺卽西與羅漢壁分界者是脈下墜卽爲中支而寂光首傳寺倚之前度息陰軒東轉而盡於大土



閣者也。由望臺平行而西，又二里半而過此嶺嶺之西，石崖漸出，高擁於後，乃折而北上，半里得碧雲寺，寺乃北京師諸徒所建，香火襍沓，以慕師而來者衆也。師所栖真武閣，尚在後崖懸嵌處，乃從寺後取道宛轉上之，半里入閣，叅叩男女滿閣中，而不見師。余見閣東有臺，頗幽，獨探之。一老僧方濯足其上，余心知爲師也，拱而待之。師卽躍而起，把臂呼同聲相應，同氣相求，且詮解之。手持二襪未穿，且指其胸曰：余爲此中忙甚，襪垢二十年未滌，方持襪示余，而男婦聞聲湧至，膜拜不休。臺小，莫容則分番迭換。師與語言，人人殊，及念佛修果，娓娓不竭。時以道遠，余先辭出，見崖後有路可躡，復攀

遊記

六册下  
滇五

二十四

援其上，轉而東，得一峽，上緣有龕，可坐，梯險登之，復下，碧雲菴適慧心在，以返，悉檀路遙，留余宿。主寺者以無被難之蓋，其地高寒也。余乃亟下，南向二里，過白雲寺，已暮，色欲合，從其北，傍中支腋行，路漸平而闊，二里過首傳寺，暗中不能物色，又東南一里餘，過寂光，一里過大覺，又東一里過西竺，與大道別行，松林間，茫不可見，又二里，過悉檀前，幾從龍潭外下，回見燈影，乃轉覓抵其門，則前十方堂已早閉，不肯啓，叩左側門，乃得入宿焉。

二十六日，晨起飯，宏辨言今日豎塔心爲吉日，可同往一看。幸定地一處，卽可爲靜聞師入塔，余喜甚，宏辨引路前，由龍



潭東二里過龍沙內支其腋間一穴在塔基北半里其脈自塔基分派處中懸而下先有三塔皆本無高弟也最南一塔卽仙陀純白之師師本嵩明籍仙陀純白向亦中表皆師之甥後隨披薙又爲師弟師歸西方在本無之前本公爲擇地於此而又自爲之記余謂辨公乞其南爲靜聞穴辨公請廣擇之又有本公塔在嶺北亦惟所命余以其穴近仙陀之師爲便議遂定靜聞是日入窆

二十七日

有缺文

余見前路漸翳而支間有迹可躡石而上遂北上攀陟之屢懸峻梯空從崖石間作猴升一里半則兩崖前突皆純石撐霄拔壑而起自下望之若建標空中自上凌

遊記

六册下  
滇五

二十五

之復有一線連脊又如瓊臺中懸雙闕竝倚也後卽爲橫亘大脊披叢莽而上有大道東西橫山脊卽東自雞坪關山西上而達於絕頂者因昔年運甃造城絕頂開此以通驢馬余乃反從其東半里凌重崖而上然其處上平下嵌俯瞰莫可見不若黥頭峯之突聳而出可以一覽全收也其脊兩旁皆古木深翳通道於中有開處下瞰山後其東北又峙山一圍如箕南向所謂摩尼山也卽此山餘脈所結者其西北橫拖之支所謂後趾也卽南聳而起爲絕頂者故絕頂自南壑望之如展旂西立羅漢九層之脊則如展旂東立自北脊望之則如展旂南立後趾之脊則如展旂北立此一山大勢也若



桃花箐過脊又在絕頂西南峽中南起爲香木坪之嶺東亘爲禾字孔之脊與羅漢壁點頭峰南北峙爲兩界此在三距西南支之外乃對山而非雞足矣若南條老脊自香木而南走烏龍壩羅漢壁點頭峯又其東出之支非老幹矣山後卽爲羅川地北至南衙皆鄧川屬與賓川以此山脊爲界故絕頂卽屬鄧川而曹溪華首猶隸賓川焉若東北之摩尼則北勝浪滄之所轄此又以山之東麓雞坪山爲界者也從脊直北眺雪山一指豎立天外若隱若現此在麗江境內尚隔一鶴慶府於其中而雪山之東金沙江實透腋南注但其處逼夾僅丈餘不可得而望也由脊道西行再降再起五里有路

遊記

六册下  
滇五

二十六

自南而上者此羅漢壁東旃檀嶺道也交脊而西北去者此循後趾北下鶴慶道也交脊而東北下者此羅川道也隨脊而西者絕頂道也於是再上再紆而北又二里餘而抵絕頂之下其北崖雪痕皚皚不知何日所積也又南上半里入其南門門外墜壑而下者獼猴梯出銅佛殿道由北門出陟後脊轉而西南下者東身峽出禮佛臺從華首門會銅佛殿道而獼猴梯在東南由脊上東身峽在西北由雷中此登頂二險而從脊來者獨無之入門卽迦葉殿此舊土主廟基也舊迦葉殿在山半歲丁丑張按君謂絕頂不可不奉迦葉遂捐貲建此而移土主於殿左其前之天長閣則天啓七年海鹽



朱按君所建後有觀風臺亦閣也爲天啓初年廣東潘按君所建今易名多寶樓後又有善雨亭亦張按君所建今貌其像於中後西川倪按君易名西脚邊廬語意大含譏諷殿亭四圍築城環之復四面架樓爲門南曰雲觀指雲南縣昔有彩雲之異也東曰日觀則泰山日觀之義北曰雪觀指麗江府雪山也西曰海觀則蒼山洱海所在也張君於萬山絕頂與此巨役而沐府亦伺其意移中和山銅殿運致之蓋以和在省城東而銅乃西方之屬能尅木故去彼移此有造流言以阻之者謂雞山爲麗府之脈麗江公亦姓木忌金尅將移師雞山今先殺其首事僧矣余在黔聞之謂其說甚謬麗北

遊記

六册下  
滇五

二十七

雞南聞雞之脈自麗來不聞麗自雞來姓與地各不相涉尙尅之有及至此而見銅殿具堆積迦葉殿中止無地以豎尙候沐府相度非有阻也但一城之內天長以後爲河南僧所主前新建之迦葉殿又陝西僧所主以張按君同鄉故沐府亦以銅殿屬之惜兩僧無道氣不免事事參商非山門之福也余一入山卽聞河南陝西二僧名及抵絕頂將暮見陝西僧之叔在迦葉殿遂以行李置之其煙明空尙在羅漢壁西來寺由殿側入天長閣蓋陝僧以銅殿具支絕迦葉殿後正門毋令從中出入也河南僧居多寶樓下留余晚供觀其意殊憤憤余於是皆腹誹之還至土主廟中寒甚陝僧熬火供



果爲余談其姪明空前募銅殿事甚悉今現在西來可一顧也余唯唯。

二十八日晨起寒甚亟披衣從南樓觀日出已皎然上升矣晨滄後卽錄碑文於天長善雨之間指僵有張憲副二碑最長獨不及錄還飯迦葉殿乃從北門出門外岡脊之上多賣糝淪粉者脊之西皆削崖下覆豈卽向所謂捨身崖者耶北由脊上行者一里乃折而西下過一敞閣乃南下束身峽巨石雙迸中窟成坑路由中下兩岸逼束而下墜甚峻宛轉峽中旁無餘地所謂束身也下半里得小坪伏虎菴倚之菴南向從其前多賣香草者其草生於山脊循捨身崖東南轉爲

遊記 六册下

滇五

二十八

曹溪華首之道遶菴西轉盤絕壁之上是爲禮佛臺太子過元關余乃先過禮佛臺有亭在臺東亦中坳臺峙其前石叢起中懸絕壑之上北眺危崖倒插於深壑中乃絕頂北盡處也其下卽爲桃花箐但突不能俯窺耳其東南壑中則放光寺在焉其西隔塢相對者香木坪也是臺當絕頂西北隅懸絕處凌虛倒影若浮舟之駕壑爲一山勝處而亭旣傾敝不容無慨臺之北崖壁倒懸磴道斬絕而西崖之巖壑中者萼瓣上迸若蒂斯啓遙向無路乃棧木橫崖端飛札接翼於層巒之上遂分帶而蹈如入菴房中空外透欲合欲分穿其奧窟正當佛臺之下乃外石之附內石而成者上連下迸裂透



兩頭側身而進披隙而出復登南臺之上仍東過伏虎循巖  
傍壁盤其壑頂仰視轟崖忽忽欲墮而孰知卽向所振衣躡  
履於其上者耶東南傍崖者一里餘有室倚崖曰曹溪寺以  
其側有水一泓在轟崖之下引流墜壑爲衆派之源有似宗  
門法脈也稍下路分爲二正道東南循崖平去小徑西下危  
坡余睇放光在西南壑便疑從此小徑是西循之一里餘轉  
而北逾一嘴已盤禮佛臺之下其西北乃桃花箐路而東南  
壑底終無下處乃從舊路返二里出循崖正道過八功德水  
於是崖路愈逼仄線底緣嵌絕壁上仰眺祇覺崇崇隆隆而  
不見其頂下瞰祇覺昏昏冥冥而莫晰其根如懸一幅萬仞

遊記

六冊下  
滇五

二十九

蒼崖圖而綴身其間不辨身在何際也東一里崖勢上飛高  
穹如簷覆環其下如戶闕形其內壁立如掩扉蓋其石齒齒  
皆墮而不盡墮之餘所謂華首門也其高二十丈其上穹覆  
者又不知凡幾蓋卽絕頂觀海門下危崖也門之下倚壁爲  
亭兩旁建小甍塔囊之卽經所稱迦葉受衣入定處待六十  
百千歲以付彌勒者也天台王十岳土性憲副詩偈鐫壁間而  
倪按院大書石狀奇絕四字橫鐫而朱丹之其效擗耶黥面  
耶在東身書石狀大奇在袞袞書石狀又奇在兜率峽口書  
石狀始奇凡四處各換一字山靈何罪而受此耶又半里轟  
崖東盡石脊下垂有寺倚其東是爲銅佛殿今扁其門曰傳



燈寺蓋卽絕頂東突由猢猻梯下墜爲此再下卽迦葉寺而爲西南支發脈者寺東向大路自下而來抵寺前分兩岐由其北峽登寺後猢猻梯爲絕頂前門道余昨從上所瞰者由寺前循崖西轉過華首門上束身峽爲絕頂後門道余茲下所從來者蓋寺北爲峽寺西爲崖寺後猢猻梯由絕頂垂脊而下乃崖之所東盡而峽之所南環者也寺北有石峯突踞峽中有菴倚其上是爲袞袞石余初不知其爲袞袞石也望之有異遂不入銅佛殿而登此石至則菴僧迎余坐石上石紋離披作兩疊痕而上有圓孔僧指其紋爲迦葉袞袞指其孔爲迦葉卓錫之跡卽無遺跡然其處迴崖外繞墜壑中盤

遊記 六册下  
滇五

三十

此石綴崖瞰壑固自奇也僧瀹米花爲獻甚潤枯腸余時欲下放光聖峯諸寺而不能忘情於猢猻梯遂循石右上半里升梯梯乃自然石級有叠磴痕可以啣趾而痕間石芒齒齒著足甚難脊左瞰卽華首蠡崖之上右瞰卽袞袞墜壑之端其齒齒之石華首門乃垂而下此梯乃錯而上者然質則同也上半里數折而梯盡仍從峽上問去頂迴絕乃返步下梯由銅佛殿北東下峽中一里橫盤峽底有菴當其中所謂兜率菴也已半傾其後卽絕頂與羅漢壁分支前突處菴前峽復深墜循菴橫度循左崖下半里崖根有窪內嵌前有巨樹流蔭并鶴响居士詩碑其前峽遂深蟠路從其上又分爲兩



循右峽中西南下者爲迦葉寺聖峯寺西支大道循左崖下  
東向行者爲西來寺碧雲寺羅漢壁間道余時身隨西峽下  
而一步一回眺未嘗不神飛羅漢壁間也下半里爲仰高亭  
在懸峽中因圯未入旣下又半里出峽爲迦葉寺其門東向  
中亦高敞此古迦葉殿近因頂有新構遂稱此爲寺云入謁  
尊者從其前南向循岐而下其路峻而大兩丐者覆松爲棚  
曲折夾道數十折一里餘而至會燈寺寺南向入謁而出東  
下半里有岐西去者放光寺道也恐日昃不及行遂不西向  
而東趨其路坦而大一里爲聖峯寺寺東向踞分支之上前  
有巨坊後有傑閣其勢甚雄拓閣祀玉皇今皆以玉皇閣稱

遊記

六册下

滇五

三十一

之從此北瞻西來寺高綴層崖之上屏霞亘壁飄渺天半其  
景甚異出寺東隨隴行二里過白雲寺又從其右東行一里  
半過慧林菴則左右兩溪合於前而隴盡遂渡其左峽東過  
大覺寺蔬園一里從息陰後逾中支之脊從千佛閣前觀街  
子街子者惟臘底集山中爲朝山之節昔在石鐘寺前今移  
此以近大覺爲諸寺之中也由街子東半里過西竺寺又二  
里餘入悉檀具後知沈公華野乃翁來叩尙留待寺間亟下樓  
而沈公至各道傾慕之意時已暮寺中具池湯候浴遂與四  
長老及沈公就浴池中池以甃甃長丈五闊八尺湯深四尺  
炊從隔壁釜中竟日乃溫浴者先從池外挽水滌體然後入



池坐水中浸一時復出池外擦而滌之再浸再擦浸時不一動恐垢落池中也余自三里盤浴後入滇祗澡於溫泉如此番之浴遇亦罕矣

二十九日飯於悉檀同沈公及體極之姪同遊街子余市鞋顧僕市帽遇大覺遍周亦出遊欲拉與俱余辭歲朝往祝蓋以其屆七旬也既午沈公先別去余食市麩一甌一里餘從大乘菴上幻住一里入幻住見其額爲福寧寺問道而出猶不知爲幻住也由其右過峽西北行一里而入蘭陀寺寺南向由正殿入其東樓良一師出迎問殿前所臥石碑曰此先師所撰迦葉事跡記也昔暨華首門亭中潘按君建絕頂觀

遊記 六册下  
滇五

三十三

風臺當事者良之頂將摩鐫新記良一師聞而往止之得免以華首路峻不得下因紆道置此余欲錄之其碑兩面鐫字而前半篇在下良一指壁間挂軸云此卽其文從碑謄寫而出者余因低懸其軸以案就錄之良一供齋沈公亦至齋後余度文長不能竟令顧僕下取臥具沈公別去余訂以明日當往叩也迨暮錄猶未竟顧僕以臥具至遂臥蘭陀禪榻顧僕傳宏辨安仁語曰明日是除夕幸爾主早退寺毋令人懸望也余聞之爲悽然者久之

三十日早起盥櫛而華野至相見甚慰同飯於蘭陀余仍錄碑完而華野已去遂由寺循脊北上其道較坦一里轉而東



一里出莘野廬前小靜室又半里而入莘野樓則沈公在而  
莘野未還沈公爲具食莘野適至遂燕其樓父子躬執爨煨  
芋煮蔬甚樂也莘野懇令顧僕取臥具於蘭陀曰同是天涯  
何必以常住靜室爲分余從之遂停寢其樓之北楹其樓東  
南向前瞰重壑左右抱兩峯甚舒而稱樓前以杪松連皮爲  
欄製朴而雅樓窓疎櫺明淨度除夕於萬峯深處此一宵勝  
人間千百宵薄暮凭窓前瞰星辰熒熒下垂塢底火光遠近  
紛拏皆朝山者徹夜熒然不絕與瑤池月下又一觀矣

裔孫 熙海南校字

遊記 六册下  
滇五

三十三